



Página 5

Segun MEP: Minister Croes a entrega un dossier 'completamente bashi' den caso di vuelo den jet priva



Página 3

- Evaluacion Hulandes ta cuestiona efectividad di maneho financiero y reforma na Aruba

Página 4

- Dr. Israel Posner: Privacidad di pashent por ta na riesgo cu introduccion di "eDesk"

Página 2

- Merca atrobe ta evita tuma responsabilidad pa atake riba scol na Iran

Página 23

DVG ta monitor desaroyonan internacional relaciona cu Ebola




Página 7

Canasta alimentario di famianan Venezolano a aumenta cu 5,5% na april



Página 10



Página 24

Procurador
General
interino di
Merca ta
defende fondo
pa aliadonan di
Trump cu a ser
persigui

Dr. Israel Posner: Privacidad di pashent por ta na riesgo cu introduccion di “eDesk”

Na maart Horacio Oduber Hospital (HOH) a introduci un sistema digital nobo yama eDesk den un esfuerzo continuo pa mehora eficiencia operacion den e sector. E sistema nobo—diseña pa reduci congestion administrativo—ta encera un portal unda dokter y pashentnan por tin acceso na historia medico, resultado di test y citanan binidero. Pa Aruba unda avance tecnologico tradicionalmente ta cana slow, e sistema nobo aki ta priminti eficiencia y contest rapido, haciendo cuidu medico mas accesible. Na mesun momento, no por keda sin mencion e riesgonan cu ta persistente den un mundo cu ta birando mas y mas digitalisa.

Dokter Israel Posner, Arts-anestesiologo, especialista den maneho di dolor y ex-minister di Salud Publico di Aruba, a trece su preocupacion dilanti den un articulo di opinion publica un siman pasa, centra den puntonan debil cu ta existi den infraestructura digital riba e isla cu por crea menasa pa informacion sensitivo di residente.

Manera el a splica den un video publica riba LinkedIn relaciona cu su articulo, casi tur ciudadano di Aruba ta depende riba servicio medico di HOH. Esaki a resulta den retrasonan grandi, falta di cita y mal comunicacion cu ta gasta recurso y pone mas presion riba empleadonan. E consecuencia di un fayto por ta grandi, unda pashentnan ultimamente lo keda blokia for di acceso medico.

E argumento principal di Posner ta cu e metodologia di un proceso automatiza pa comunica informacion priva di hende via telefon ‘smartphone’ ta crea un vulnerabilidad pa hackernan horta dato di hende. Esaki ta specialmente berdad durante proceso di verifica number di telefon. Posner ta argumento cu e sistema ta depende riba un suposicion cu esun cu ta tuma e yama di un number specifico ta e pashent corecto. Segun e, esaki por trece problema pasobra number di telefon nunca a ser diseña pa ta identificadornan sigura. Nan ta fluido y ta traha via señal telefonico, cual awendia por ser facilmente intercepta pa



hackernan.

Posner ta presenta su pregunta clave: “Kico ta pasa ora e unico registran medico di e isla ta protegi pa un canal di comunicacion cu ta mesun facil pa intercepta cu un señal telefonico?”

Debilidad di number telefonico

Posner ta trece dilanti un riesgo di “SIM-swap”, unda hackernan por intercepta e telefon door di cambia of kita number di telefon. Manera e ta cuestiona, “Ken ta garantiza cu e sms cu un confirmacion di cita of resultado di test ta yega na e persona corecto?” E dokter su argumento no ta bin den bashi.

E problema di SIM-swapping ta presenta den tur continente na mundo, incluyendo den paisnan unda avance tecnologico y fortalecimiento di ciberseguridad ta ser manteni pa infraestructuranan hopi mas grandi y moderno.

Federal Bureau of Investigations (FBI) di Merca ta nota cu aumento di fraude via SIM-swapping a alcansa 12 milyon dollar entre 2018 y 2020 so, y 68 milyon dollar na 2021. Na reino Uni, a registra un aumento di casi 2.500 caso di SIM-swapping—for di 239 na 2023 pa 2.760 na 2024. Na Australia, 90% di casonan di SIM-swapping ta pasa sin cu mester interactua cu e victima. Manera Posner ta splica, e hacker por move via proveedor di number di telefon directamente.

Y unda datonan personal ta involvi, e menasa ta bira sumamente importante, specialmente pa poblacion di un isla chikito manera Aruba

unda infraestructura digital no ta mesun fuerte cu paisnan grandi. Mirando cu HOH ta proceso informacion di tur ciudadano riba e isla, e preocupacion ta aun mas grandi, como cu fayto den un instituto cu tin monopolio den nos sector medico por causa problema cu por afecta henter e isla.

Verificacion via yamada telefon tambe ta presenta e otro banda di menasa: Imitacion di personal di HOH.

Den e ultimo siman cu a pasa, HOH a haci un publicacion unda a bisa cu lo cuminsa yama pashent pa verifica nan number di telefon. Segun Posner, esaki ta invita actividad di fraude. Manera e ta splica, criminalnan cu conocimiento di e sistema por imita un empleado di HOH y asina saca informacion confidencial di pashentnan. Mirando cu den e lunanan binidero ciudadano lo anticipa un yamada di hospital, tin chance cu nan lo tuma e yamada aki sin sa cu nan victima di “vishing” (voice phishing).

Vishing ta un fenomeno global y cu por afecta specialmente esnan cu alfabetizacion digital abao, por ehempel adultonan mayor. Y esaki ta un preocupacion cu HOH tambe a atende, subrayando cu lo repasa solamente e informacion necesario pa verifica number di telefon cu tin registra. E hospital ta haci yamado na pueblo di Aruba pa keda atento cu un yamada di e number 527-4000.

Pero Posner ta di opinion cu esaki no ta suficiente. Den su

perspectiva, ciudadanonan mester tin un anticipacion cla di kico lo puntra y kico no. Segun e, esaki mester ta un parti “structural di e comunicacion cu pashentnan.”

Menasa pa e sistema digital

Den nan comunicado publica na maart, HOH a informa cu a firma contrato cu compania Hulandes Chipsoft, pa adopta nan programa di pashent cu ta yama HiX. E hospital a sigui informa cu e transicion pa e plataforma aki a rekeri un año di planning y preparacion, ademas di entrenamento di personal.

Pero hasta un compania grandi manera Chipsoft ta keda vulnerable na ciberataque. Na april 2026 mes e compania a sufrir di un atake di ransomware, cual a stroba algun di su sistemanan, incluyendo sistemanan usa pa algun dokter y centronan di cuidu den e pais. Manera NOS a reporta e tempo ey, hackernan a haya acceso na software cu ta traha dossier di pashent.

Aunke a reporta cu interceptacion den hospitalnan a keda hopi limita, 15 hospital a tuma iniciativa despues cu e atake a sucede pa blokea e sistema como medida preventivo. No a especifica si HiX a ser afecta pa e atake.

Pa proteccion di dato personal, Posner ta convoca e Landsverordening Bescherming Persoonsgegevens (LBP) unda mester tin “limitacion di meta di dato, minimisacion di dato colecta, seguridad, y e derecho di pashentnan pa wak y coregi nan propio dato.”

Posner ta argumenta cu den HOH su publicacion tocante eDesk, no ta menciona si a conduci un Privacy Impact Assessment (PIA), si tin un funcionario responsable pa protegi e datonan di pashent y con largo e datonan lo ser warda riba e portal. Posner ta enfatisa cu e proceso aki ta un obligacion legal, unda Inspectie Volksgezondheid Aruba (IVA) mester supervisa.

Algun lo keda exclui

Un otro menasa presenta pa Posner ta cu algun hende den comunidad por keda exclui di e sistema nobo, specialmente esnan cu no ta usa telefon. Grado di embebecimento na Aruba ta birando cada año mas halto, unda gran parti di HOH su pashentnan ta adultonan mayor. Sinembargo, mayoria adulto mayor no tin alfabetizacion digital, pues e sistema aki ta laga nan na banda. Den Posner su perspectiva, esaki lo amplia desigualdad den cuidu medico. Aki e dokter ta enfatisa un solucion hibrido: un “baile” unda pashentnan por verifica dato di contacto durante cada cita y un sistema activo cu ta atende cu pashentnan cu no ta usa telefon.

A pesar di su preocupacionnan, Posner ta reconoce e banda positivo di eDesk, enfatisando cu intencion tras e iniciativa ta bon bini. Manera e ta splica, bon comunicacion ta reduci falta di cita, mehora continuidad di cuidu y alivia trabao administrativo. Un sistema digital cu ta funciona bon por trece beneficio real. Na mesun momento, e dokter ta enfatisa cu mester tuma medida pa fortalece proteccion di pashent, incluyendo entre otro:

- Implementacion di mecanismo di verificacion di dos factor (two-factor verification) banda di djis number di telefon;
 - Un comunicacion publico explicita y repetida tokante kico eDesk lo y no lo puntra via telefon;
 - Un auditoria independiente di ciberseguridad di e sistema;
 - Un plan di continuidad documenta pa ora di interrupcion di sistema
- Medidanan structural ta inclui supervision riba cumplimiento di privacidad di sistema den sector di cuidu medico y un acuerdo formal di intercambio di dato cu AZV.

Na caminda pa audiencia di LAR:

Segun MEP: Minister Croes a entrega un dossier ‘completamente bashi’ den caso di vuelo den jet priva

Minister Gerlien Croes su controversial vuelo den jet priva pa Corsou ta un biaha den atencion publico. Segun declaracion di parlamentarionan di fraccion di MEP, despues cu nan a presenta na e Bezwaar Adviescommissie LAR ayera, ainda minister Croes no a entrega e documentacion cu nan a pidi tocante e biahe en cuestion. Segun e miembronan di fraccion di MEP, e dossier cu a ser presenta tabata “completamente bashi”, a pesar di varios promesa publico cu informacion lo ser entrega.

E topico cu a domina discusion politico na Aruba pa varios luna caba, ta draai rond di un biahe cu minister Gerlien Croes a haci na november 2025 den un jet priva rumbo pa Corsou. Oposicion a cuestiona na varios ocasion ken a paga e vuelo, si e areglo tabata conforme regulacionnan di integridad y pakico documentacion oficial ainda no a ser entrega a pesar di lunanan di preguntanan parlamentario.

Den su declaracion na medianan di prensa local despues di e reunion, lider di fraccion MEP Evelyn Wever-Croes a bisa cu e asunto a yega na e punto aki pa cu Parlamento a usa practicamente tur via disponibel pa haya informacion, pero no a logra. El a splica cu oposicion prome a purba di haya informacion via preguntanan parlamentario, pero e preguntanan ey nunca a ser contesta debidamente. Despues di esey, oposicion a inicia un procedura bao di Landsverordening Openbaarheid van Bestuur (LOB), e ley di transparencia publico di Aruba, pa pidi divulgacion oficial di documentacion relaciona cu e vuelo.

Pero e peticion ey tampoco a produci e informacion cu a ser pidi, loke a causa cu oposicion apela na Bezwaar Adviescommissie LAR. E caso lo ser trata formalmente otro siman diamars, pero representante di ambos banda a haya oportunidad un siman prome cu e caso ser trata pa inspecciona e dossiernan como preparacion pa e audiencia.

Parlamentario Wever-Croes



a enfatisa cu nan a keda sorprendi ora cu nan a descubri cu e dossier, segun el a indica, no tabatin ningun prueba, aclaracion, comprobante di pago ni hustificacion presenta pa e minister. El a critica minister Croes pa crea impresion publico cu e lo presenta informacion pidi, mientras cu ningun documentacion no a ser entrega.

“E tabata den Parlamento ainda algun dia pasa y a bisa cu den e caso di LAR aki e ta bay trece tur informacion dilanti, pero lamentablemente a constata cu esaki no ta berdad,” Wever-Croes a indica.

El a argumenta tambe cu e controversia por a ser cera hopi tempo pasa caba si simplemente el a presenta comprobante di pago of documentacion oficial desde comienso. Na lugar di esey, segun e lider di fraccion di MEP, e falta di transparencia a haci cu e tema sigui domina debate politico y mantene tension den arena politico.

Despues di ayera, Wever-Croes a splica, nan ta bay prepara pa e caso cu ta bay tuma lugar otro siman diamars. Den e caso oposicion lo trece nan puntonan pa dilanti cu ta entre otro cu e minister ta nenga di duna informacion, ta viola palabracionnan, y cu, segun e parlamentario, ta burla e sistema, y no kier bin dilanti y bisa berdad.

“Awe nos a bin cu e speranza cu nos por a pone un punto final tras di tur e cos aki pa asina nos tur por concentra riba e cosnan mas importante den nos pais, pero lamentablemente nos ta mira cu ainda nos no por pone un punto final, cu e minister ta scoge

pa alarga e proceso aki,” el a subraya.

Parlamentario Rocco Tjon di su banda a describi e desaroyo como un gran desilusion. Segun Tjon, e asunto por a keda cla cu “pruebanan hopi simpel”, pero minister a scoge pa sigui prolonga e conflicto door di no entrega documentacion.

El a argumenta cu e procedura continuo ta costa recurso publico innecesariamente y ta consumi tempo di profesionalnan, mientras cu tambe ta afecta confiansa publico den institucionan politico. El a agrega cu e audiencia otro siman lo ta decisivo pa determina cual ta e siguiente paso legal y politico.

Parlamentario tambe a anuncia cu nan tin un reunion programa cu SE Gobernador di Aruba, Alfonso Boekhoudt pa trece dilanti e nan preocupacionnan serio y tambe pa presenta consehonan huridico cu e fraccion a ricibi relaciona cu e caso.

Segun Tjon, nan tin conseho huridico di expertonan di Merca y di expertonan local, dedica riba e parti di aviacion y dedica na tur regulacion cu tin di haber cu integridad. Ambos conseho e fraccion lo entrega na Gobernador.

Por ultimo, parlamentario Tjon a recorda pueblo cu minister Gerlien Croes no a biaha pa Corsou pa vakantie, pero el a biaha como un mandatario den funcion pa trabou y pa e motibo ey e tin e deber di presenta informacion y documentacion cu Parlamento pidi.

“E tin e deber tambe di con-



testa e mas di 100 pregunta cu nos a haci na dje, e tin e deber di bin Parlamento y acudi na e mas di 5 reunion publico cu nos a solicita, e tin e deber di bin Parlamento pa presencia e mas di 10 vragenuur cu nos a puntra y awe nos ta wak cu te hasta ora nos a haci uso di un derecho hancra den un ley, e LOB, minister Gerlien Croes ta opta pa laga e map completamente bashi,” el a finalisa.

E controversia di e biahe di jet priva a cuminsa na november 2025, ora minister Gerlien Croes a biaha pa Corsou den un jet priva prome cu un conferencia deportivo. Segun splicacionnan anterior duna pa e minister, originalmente e tabatin intencion di biaha cu un vuelo comercial e siguiente dia pa obligacionnan oficial di trabou. Sinembargo, despues el a ricibi un invitacion di autoridatnan di Corsou pa asisti na e celebracion di yegada di e seleccion nacional di futbol di Corsou despues di nan clasificacion pa Mundial. Pero pa motibo cu no tabatin asiento comercial disponibel pa e dia specifico ey, el a opta pa usa un avion priva.

Minister Croes a indica cu el a paga personalmente pa e vuelo cu su propio salario y a nenga cu tin algun irregularidad. Na diferente ocasion el a insisti cu e biahe tabata relaciona cu trabao y cu e critica cu e ta enfrenta ta principalmente politicamente motiva.

E asunto a bira ainda mas complica despues cu oposicion a cuestiona, den caso cu si efectivamente a haci un pago pa e vuelo, si operador di avion tabatin e autorisacion necesario pa conduci servicio

comercial paga.

Representantenan di oposicion a splica cu vuelonan conduci a cambio di compensacion normalmente ta rekeri un Air Operator Certificate (AOC). Segun declaracionnan, e avion cu ta central den e controversia alegadamente no tabatin e certificacion ey, loke potencialmente ta crea preguntanan legal adicional dependiendo di con e areglo financiero a ser estructura.

Fraccion di MEP ta argumenta cu e falta di documentacion oficial ta haci imposible pa verifica independientemente si e vuelo tabata un regalo, un areglo desconta of un pago legalmente conforme. Na mesun momento nan ta argumenta cu e rol constitucional di supervision di Parlamento ta ser obstaculisa door di e falta di divulgacion di documento y informacion.

E impacto politico di e asunto ta sigui crece mientras miembronan di oposicion ta mantene cu ministernan tin obligacion di coopera completamente cu supervision parlamentario, specialmente ora preguntanan ta relaciona cu posible conflicto di interes of standardnan di integridad publico. Di otro banda partidarijonan di e minister ta argumenta cu e tema a bira excesivamente politisa y exagera pa ganashi politico.

A pesar di lunanan di debate, e pregunta central ainda ta keda sin respuesta definitivo: si e minister por presenta prueba concluyente mustRANDO exactamente con e vuelo den jet priva a ser organisa y paga.

Evaluacion Hulandes ta cuestiona efectividad di maneho financiero y reforma na Aruba

Gobierno Hulandes a reconoce cu e maneho dirigi pa fortalece e resistencia socioeconomico den e parti Caribeense di Reino, incluyendo Aruba, a duna resultado mixto den e ultimo decenio, segun un rapport nobo di evaluacion publica pa ministerio di Asuntonan Interno y Relacionnan den Reino (BZK). E resultadonan ta forma parti di un esfuerzo mas amplio di gobierno Hulandes pa mehora supervision, responsabilidad y evaluacion di gasto publico u resultado di maneho den henter Reino.

E rapport, titula “Opvolging in Beeld: Periodieke rapportages Ministerie van BZK vanaf 2024,” a ser manda na Parlamento Hulandes riba 19 di mei 2026 pa minister Hulandes di Asuntonan Interno y Relacionnan den Reino, Pieter Heerma. E documento ta describi con e ministerio ta reaccionando riba recomendacionnan cu a sali for di varios evaluacion cu ta cubri diferente area di maneho, incluyendo Relacionnan den Reino, supervision financiero, gobernacion democratico y administracion publico. Aruba ta ocupa un lugha importante den seccionnan tocante maneho financiero, desaroyo socioeconomico y cooperacion entre Hulanda y e paisnan Caribeense den Reino.

Un di e conclusionnan principal cu ta afecta Aruba ta cu maneho Hulandes pa sosten y intervencion den region Caribeense hopi biaha a falta un strategia coherente pa largo plaso. Investigadornan a constata cu, aunke hopi proyecto financia of coordina pa gobierno Hulandes a logra nan meta inmediato, mehoracionnan mas amplio riba nivel social y economico hopi biaha a ser retrasa, no a ser completa of ta dificil pa midi. Segun e evaluacion, esaki tabata parcialmente debi na capacidad administrativo limita den gobiernu local, cambionan politico y coordinacion fragmenta entre ministerionan na Den Haag.

E rapport a analisa implementacion di maneho entre 2016 y 2023 bao di Artículo 4 di presupuesto di Relacionnan den Reino, cu ta enfoca riba fortalecimiento di structuranan socioeconomico na Aruba, Corsou, Sint Maarten, Boneiro, Sint Eustatius y Saba. Investigadornan a conclui cu gastonan bao di e articulo aki a fluctua fuertemente durante



añanan, principalmente pa motibo di gastonan di emergencia relaciona cu crisisnan manera pandemia di COVID-19. Solamente un parti relativamente chikito di e presupuesto tabata consisti di financiamiento structural cu BZK por a distribui independientemente.

Investigadornan a describi Artículo 4 como un mecanismo di presupuesto “residual”, cu ta permiti gobierno Hulandes reacciona rapidamente na situacionnan urgente en bes di sirbi como un marco strategico cla pa maneho di largo plaso. Nan a argumenta cu e estructura actual ta crea confusion tocante responsabilidadnan y ta debilita efectividad di esfuersonan di desaroyo den e parti Caribeense di Reino.

Pa Aruba, e resultadonan ta particularmente relevante pasobra e isla a ser envolvi hopi den diferente iniciativa Hulandes relaciona cu finanzas y gobernacion den añanan recien, specialmente despues di impacto economico di pandemia. E rapport ta menciona Aruba especificamente den discusionnan tocante protocolnan di supervision financiero, sosten di likides y esfuersonan pa mehora gobernacion fiscal.

Un evaluacion separa a revisa maneho Hulandes di supervision financiero bao di Artículo 5 di presupuesto di Relacionnan den Reino, cubriendo saneamento di debe, prestamonan, sosten di likides y supervision financiero pa Aruba, Corsou y Sint Maarten. E evaluacion aki a conclui cu intervencionnan Hulandes tabata parcialmente efectivo den mantene estabilidad financiero y confiansa di mercadonan financiero, pero mucho menos exitoso den logra mehoracionnan duradero den maneho financiero publico y reforma economico. E evaluacion a nota cu mecanismonan manera protocolnan financiero Aruba-Hulanda y e marco di supervision financiero di Reino a yuda mehora transparencia y

a brinda sosten di emergencia durante periodonan di crisis. Sinembargo, investigadornan a conclui cu reformanan economico structural y fortalecimiento institucional no a progresa suficientemente. E rapport tambe a indica cu esfuersonan pa mehora maneho financiero den e paisnan no a progresa suficiente.

Como reaccion, gobierno Hulandes a bisa cu Aruba, Corsou y Sint Maarten lo sigui traha riba mehoracion di sistemanan di maneho financiero, cu apoyo di Hulanda unda ta necesario. Oficialnan a indica cu paketenan di reforma y acuerdonan di cooperacion existente caba ta inclui medidanan destina pa fortalece supervision y capacidad administrativo.

E rapport tambe a subraya preocupacion tocante limitacionnan di e reglanan actual di supervision financiero. Investigadornan a argumenta cu sistema di supervision financiero di Reino ta laga poco espacio pa maneho economico estabilizador pasobra gobiernonan mester mantene presupuestonan anual balansa. Esaki a haci dificil pa paisnan manera Aruba reacciona flexiblemente na recesionnan economico of shock externo.

Gobierno Hulandes a reconoce e preocupacion aki den su reaccion, declarando cu e ta sostene e desaroyo di un vision pa largo plaso tocante finanzas publico den e paisnan Caribeense. Sinembargo, gobierno a enfatisa cu responsabilidad pa tal strategianan finalmente ta den man di e paisnan mes. E ministerio tambe a referi na consehonan di Fondo Monetario Internacional (IMF) indicando cu nivelnan di debe sostenibel mester ser logra prome cu maneho estabilizador mas amplio por ser implementa di un manera sigur. E evaluacion tambe a examina con Reino ta responde na crisisnan externo manera pandemia y desaster natural. Segun e rapport, Hulanda y e paisnan Caribeense ainda no

tin un marco integral pa trata crisisnan den futuro. Gobierno Hulandes a reconoce cu cada crisis ta exige un reaccion diferente, pero a indica cu nan ta explorando si aspectonan di e ley di Reino proponi pa finanzas publico sostenibel di Aruba por ser adapta pa mehora coordinacion den futuro di crisis den Reino.

Otro descubrimiento importante ta e ausencia di un vision comparti pa henter Reino tocante e futuro relacion entre Hulanda y e teritorionan Caribeense. Investigadornan a describi esaki como un “problema fundamental” cu ta limita cooperacion efectivo entre ministerionan Hulandes y ta complica esfuersonan pa aborda desafionan social y economico mas amplio den region.

Pa atende e asunto aki, e rapport ta recomenda BZK formula un vision dedica pa Relacionnan den Reino y redefini su rol coordinador den termino mas practico y facilitador. Recomendacionnan tambe ta inclui staciona mas personal di maneho den region Caribeense, mehora strategianan di comunicacion entre ministerionan Hulandes y fortalece mecanismonan di consulta cu otro departamentonan na Den Haag.

E documento tambe ta discuti uso di “subsidiacion special” brinda na entidadnan publico Caribeense manera Boneiro, Sint Eustatius y Saba. Investigadornan a conclui cu e subsidiacion aki ainda ta instrumento util di financiamiento, pero a adverti cu financiamiento temporal ta ser usa demasiado frecuentemente pa cubri gastonan structural. Nan a recomenda condicionnan mas estricto y directivanan mas cla tocante den cual caso e subsidiacion aki mester ser usa y con proyectonan mester ser monitorea.

Den anexo di e rapport, investigadornan a examina posible escenario di recorte presupuestario relaciona cu gastonan

pa Relacionnan den Reino. Sinembargo, nan a conclui cu reduccionnan mas grandi lo ta dificil pasobra gran parti di e presupuesto ta consisti di financiamiento di emergencia of gastonan legalmente obliga. Investigadornan a adverti cu recortenan general lo reduci principalmente capacidad di gobierno Hulandes pa responde rapidamente na problemanan social of economico urgente den e parti Caribeense di Reino.

En bes di recortenan amplio, e rapport ta sugeri enfoca riba maneho di proyecto mas eficiente y segura cu gobiernu local ta compromete nan mes pa cubri gastonan di mantencion den futuro y operacion relaciona cu proyectonan financia. Investigadornan a argumenta cu esaki por yuda preveni desperdicio di inversionnan y mehora sostenibilidad riba termino largo.

Apart di Relacionnan den Reino, e rapport mas amplio ta refleha presion creciente den gobierno Hulandes pa mehora metodonan di evaluacion y fortalece maneho basa riba evidencia. Varios seccion ta reconoce cu hopi area di maneho ta keda dificil pa midi efectivamente pasobra resultadonan ta depende di factornan politico, economico y social complejo.

Minister Heerma a enfatisa den su introduccion cu evaluacionnan no ta destina solamente pa midi gasto publico, pero tambe pa sostene un “gobierno cu ta siña” capaz di mehora maneho cu tempo. El a bisa cu Parlamento lo sigui ricibi actualisacionnan anual tocante con ministerionan ta sigui recomendacionnan di evaluacion.

Pa Aruba, e rapport ta ofrece un di e evaluacionnan recien mas cla di parti di gobierno Hulandes tocante efectividad di maneho den Reino cu ta afecta e isla. Aunke mecanismonan Hulandes di sosten a ser acredita pa yuda mantene estabilidad financiero durante periodonan dificil, e evaluacionnan tambe ta señala desafionan persistente relaciona cu capacidad di gobernacion, reforma economico riba termino largo y coordinacion entre Aruba y Hulanda.

E resultadonan probablemente lo influencia discusionnan den futuro entre Aruba y Den Haag tocante supervision financiero, cooperacion di desaroyo y e relacion constitucional mas amplio den Reino.

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart-Boekhoudt

Redaccion

noticia@bondia.com

Pilar Flores (hefe di redaccion)
Angenette Figuereo (closer editor)
Leo Maduro
Dilma Arends
Raisa Montilla
Oriana Geerman

Ehecutivo di Benta

Sulaika Croes
sulaika.croes@cspnv.com
Mark Gomes
mark.gomes@cspnv.com

Aviso y Arte

Sandra Loefstop
Lisa Tromp

Departamento Digital

Juan Luis Pinto

Administracion
accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Francis Dirksz

Colaboracion

Agence France Press
Ret Karibense
Data Key

Afiliacion

Sociedad Interamerica
di Prensa (SIP)

DIRECCION

Adres: Weststraat #22
Tel: 582-7800
Email: noticia@bondia.com
aviso@bondia.com
info@bondia.com
Website: www.bondia.com
Facebook: @bondianoticia
Instagram: bondiaaruba

BON DIA ARUBA ta un corant redacta y imprimi na Aruba y ta obenibel di dialuna te cu diasabra. Ningun contenido por wordo reproduci sin permiso di editor.

Dia Mundial di Diversidad Cultural: E importancia di inclusion, respet mutuo y convivencia

Tur aña riba 21 di mei, paisnan rond mundo ta conmemora Dia Mundial di Diversidad Cultural pa Dialogo y Desaroyo, un iniciativa di UNESCO cu ta promove comprendemento entre diferente cultura y ta reconoce diversidad como un elemento importante pa paz y desaroyo.

Pa Aruba, un isla conoci pa su poblacion multicultural y ambiente internacional, e dia tin un significado special. Cu mas cu 100 nacionalidad cu ta biba y traha hunto riba e isla, Aruba a bira un ehempel di convivencia entre diferente cultura, idioma y tradicion.

E celebracion internacional a ser estableci pa Nacionnan Uni na 2002 despues di Declaracion Universal riba Diversidad Cultural di UNESCO. E meta principal ta pa promove dialogo, inclusion y respet mutuo entre hende di diferente origen.

Na Aruba, diversidad ta visibel den casi tur aspecto di bida diario. For di idioma y cuminda te musica, fiesta y tradicionnan cultural, y influencia di diferente paisnan ta forma parti di identidad di e isla. Comunidadnan cu raiznan den Latino America, Caribe, Europa, Asia y Nort America ta contribui diariamente na sociedad Arubiano.

Comunidadnan di Colombia, Venezuela, Republica Dominicana, Haiti, Hulanda, China, Filipina, Surinam y hopi mas, a yuda forma e Aruba moderno. Hunto cu Arubianonan nativo, nan ta contribui na economia, cultura y forsa laboral di e isla.

Un di e ehempelnan mas cla di diversidad na Aruba ta idioma. Papiamento y Hulandes ta idioma oficial, pero Ingles y Spaño tambe ta ser papia ampliamente. Hopi residente ta comunica den varios idioma, algo cu ta refleha e mescla cultural presente den scolnan, lugar di trabao y comunidnan.

Educadornan regularmente ta menciona multilingualismo como un di e fortalezanan di Aruba. Siña y usa diferente idioma no solamente ta mehora comunicacion, pero tambe ta yuda crea mas comprendemento entre hende di diferente cultura.

Diversidad cultural tambe tin un conexion fuerte cu tur-



ismo, cu ta e pilar principal di economia Arubiano. Aruba ta ricibi bishitante di tur parti di mundo durante henter aña, y esaki a influi e apertura cultural di e isla.

Restaurant y negoshinan di cuminda ta muestra claramente e mescla cultural aki. Bishitante y residentenan por disfruta un plato tradicional Arubiano hunto cu un arepa Venezolano, cushina Asiatico, cuminda Caribense, snack Hulandes y hopi otro sabor internacional.

Influencia multicultural tambe ta visibel den musica y entretenimento local. Festival y celebracionnan publico ta muestra e caracter diverso di Aruba. Carnaval, por ehempel, ta un di e eventonan cultural mas grandi di e isla y ta reuni hende di diferente nacionalidad den un celebracion di musica, baile y creatividad. Otro eventonan cultural durante aña tambe ta promove intercambio cultural y participacion comunitario.

Lidernan di comunidad ta enfatisa cu actividadnan cultural ta yuda fortalece conexion entre diferente grupo y ta crea espacio pa hende siña di otro.

Na mesun momento, expertonan ta indica cu diversidad

cultural ta rekeri esfuerso continuo pa mantene inclusion y respet. UNESCO ta enfatisa cu diversidad so no ta suficiente; sociedadnan mester promove oportunidad igual y participacion pa tur comunidnan.

Manera hopi otro paisnan multicultural, Aruba tambe ta enfrente discusionnan tocante integracion, barera di idioma y inclusion social. Crecemento den inmigracion den ultimo decadanan a amplia diversidad di e isla, creando tanto oportunidad como desafio pa scol, institucion y dunadornan di trabao.

Educadornan ta enfatisa importancia di educacion intercultural den scolnan, pa studiantenan por siña tocante diferente cultura mientras cu nan tambe ta aprecia identidad cultural Arubiano. Organizacionnan cultural y comunitario ta sigui hunga un rol importante den preservacion di tradicionnan local y promocion di inclusion.

Pa hobennan specialmente, rednan social y globalisacion a cambia manera cu cultura ta ser comparti. Hoben na Aruba ta conecta cu tendencia internacional mientras cu nan tambe ta mantene tradicionnan familiar y custumber

local.

Dia Mundial di Diversidad Cultural ta ofrece un oportunidad importante pa reflexiona riba convivencia pacifico y e balor di respet mutuo den sociedadnan diverso.

Nacionnan Uni tambe ta señala cu industria cultural — manera musica, arte y turismo cultural — tin un impacto importante riba economia mundial. Na Aruba, artistanan local, musico y artesonan ta contribui tanto na identidad nacional como na experiencia di bishitante.

Museo, bario historico y celebracionnan tradicional ta sigui atrae turista cu ta interesa den experiencia cultura autentico. Gobierno y sector turistico tambe ta promove patrimonio cultural como un parti importante di imagen internacional di Aruba.

Diversidad religioso tambe ta forma parti di identidad multicultural di e isla. Aunke Catolicismo ta predominante, Aruba tambe tin comunidad Cristian, Hindu, Musulman, Hudiu y otro grupo religioso cu regularmente ta colabora den actividadnan social y comunitario.

Lugar di trabao na Aruba tambe ta refleha e mescla internacional di e isla. Hotel, restaurant y otro negoshinan regularmente ta emplea teamnan multinacional. Comprendermento cultural y habilidad pa comunica den varios idioma a bira competencia importante den mercado laboral local.

Aruba ta ser considera como un ehempel positivo di convivencia multicultural den Caribe. A pesar di su tamaño chikito, Aruba ta demostra con diferente comunidad por biba, traha y comparti espacio hunto.

Sinembargo, expertonan ta adverti cu inclusion ta rekeri atencion continuo. Respet, igualdad social y dialogo habri ta esencial pa preveni division y discriminacion.

Mientras Aruba ta uni cu celebracion mundial di Dia Mundial di Diversidad Cultural pa Dialogo y Desaroyo, e realidad multicultural di e isla ta muestra cu diversidad por bira un fuente di fortaleza ora cu e ta ser compaña pa respet mutuo, dialogo y sentido di comunidad.

Inicio di trabao pa determina un “armoedegrens” y “koopkrachtmeting” pa Aruba

Minister di Finanzas, Asunto Economico y Sector Primario, mr. Geoffrey Wever (Futuro), den cooperacion cu Minister di Asuntonan Social, drs. Melvin Wyatt-Ras y Minister President mr. Mike Eman (AVP), a inicia oficialmente cu e trabaonan pa determina un definicion nacional di pobreza (“armoedegrens”) na Aruba y pa desaroya un sistema pa midi poder di compra (“koopkrachtmeting”).

E proyecto aki ta ehecuta bao liderazgo di Minister Wever, como minister encarga cu Oficina Central di Estadistica di Aruba (CBS).

E iniciativa aki ta marca un momento historico pa Aruba mostrando vision comparti y vision continua den beneficio di e habitantenan di Aruba, segun un comunicado di gobierno.

Den e prome periodo cu Minister Geoffrey Wever tabata minister, e tabatin atencion pa e necesidad di un definicion nacional di kico ta pobreza na Aruba y a cuminsa encamina e proceso pa cu esaki. For di Staten e topico di linea di pobreza a wordo treci dilanti den e contexto di cu no mester confundi bestansminimum como linea di pobreza.

Na 2024, riba peticion di Minister Geoffrey Wever, Commissie Bevolking en Ontwikkeling, forma e momento ey door di Centraal Bureau Statistiek (CBS) y Departamento di Asun-

tonan Social (DAS), como miembronan permanente di e comision, a duna conseho riba e topico aki na minister Wever, como minister encarga cu CBS, y na Minister Rocco Tjong, como minister encarga cu asuntonan social y a dicidi di sigui e proceso pa por yega na un definicion nacional di pobreza na Aruba.

Den cuadro di esaki, minister Wever a acerca Hulanda, por medio di Landspakket tema Economia, pa sondea e posibilidad pa pone e proyecto aki como parti di e Landspakket pa asina fortifica e desaroyo y monitoreo periodicamente di maneho social-economico di Aruba. Hulanda tabata dispuesto pa coopera den esaki. Riba peticion di minister Wever, Consejo di Minister a bay di acuerdo pa añadi e proyecto aki na Landspakket tema Economia.

Den 2025 e trabaonan pa traha e plan pa e proyecto (plan van aanpak) ‘De bepaling van de armoedegrens en koopkrachtmeting voor Aruba’ a tuma lugar door di profesionalnan di Aruba y Hulanda y na final di 2025 minister Wever a presenta e ‘plan van aanpak’ ‘De bepaling van de armoedegrens en koopkrachtmeting voor Aruba’ na Consejo di Minister di Gabinete AVP-FUTURO, y Consejo di Minister di Gabinete AVP-FUTURO a bay di acuerdo cu e proyecto aki.

Despues di esaki, minister Wever a haci entrega oficial di e ‘plan van aanpak’ ‘De bepaling van de armoedegrens en koopkrachtmeting voor



Aruba’ na Hulanda. Awor, cu e kick-off meeting aki, e proyecto ta start y e trabao ta inicia. Hulanda a pone USD 340.000,- disponibel pa e proyecto aki y un experto tecnico di Centraal Bureau voor de Statistiek Hulanda lo asisti den e proyecto aki.

E proyecto ta di sumo importancia pa desaroyo y monitoreo di maneho socioeconomico. Durante e proyecto lo contesta e pregunta principal: Kico ta pobreza na Aruba? Pa contesta esaki mester defini e concepto pobreza y mester desaroya un metodo pa midi e prevalencia di pobreza pa Aruba periodicamente teniendo na cuenta cu, entre otro, e poder di compra y e desaroyo di poder di compra pa individuonan y hogarnan. Cu e proyecto aki lo por traha maneho mas enfoca riba e gruponan mas vulnerabel den nos comunidad door di brinda informacion obhetivo y concreto cu actualmente no ta disponible.

Durante e proceso lo traha cu varios stakeholdernan local

pa asina incorpora e contexto local y relevante den e definicion nacional di pobreza. E forma di traha aki tin como meta pa crea sosten amplio y pa tene cuenta cu informacion al caso di nos sociedad pa e definicion final. Como parti di e cooperacion tecnico pa e proyecto, un experto di CBS Hulanda recientemente a yega Aruba y lo ta presente pa un periodo di un aña pa asisti cu implementacion di e proyecto.

E proyecto ta consisti di tres componente principal: Determina e definicion di pobreza na Aruba; Desaroya un metodologia pa midi pobreza y poder di compra; Hancra e calculacion di pobreza na un manera structural na Oficina Central di Estadistica di Aruba.

Ta premira cu e proyecto lo wordo finalisa na 2027. Despues di esaki, Aruba pa prome biaha lo dispone di un sistema structural pa midi pobreza y monitorea e desaroyo di poder di compra.

“Prioridad di maneho economico di Gabinete AVP-FUTURO ta pa garantiza desaroyo economico cu participacion di tur hende. Ora nos sa na un manera oficial, structural y confiabel ken ta mas vulnerabel y con e desaroyo di poder di compra ta, como gobierno nos por implementa maneho cu ta mas directo y efectivo basa riba hechonan y data real,” segun minister Wever. “Esaki ta duna gobierno un miho bista y hermentnan mas efectivo pa combati pobreza na Aruba. Desde 2024 nos a implementa e “koopkrachtmodel” cu Economisch Bureau Amsterdam (EBA) a desaroya cual ta ser usa pa yuda traha y ehecuta maneho cu ta tene cuenta cu of mitiga e efecto di maneho riba e poder di compra. Cu e definicion di pobreza na Aruba y un sistema pa midi e pobreza y poder di compra na Aruba di manera structural, Gobierno di Aruba ta dispone di mas herment cual ta aporta na bon gobernacion (‘good governance’).”

Dunando back na comunidad Studiantenan di Scol di Polis a participa den Aruba Doet 2026

Den fin di siman futuro agentenan policial a forma parti y participa na e programa di Aruba Doet.

E studiantenan hunto cu otro instancia y departamento a uni forza pa asina duna un man na Savaneta Scouting.

Di e forma aki trahando hunto ta duna un man bek pa yuda nos comunidad. Cuerpo Policial Aruba semper contribuyendo na nos Pais, poniendo man na obra cu participacion na diferente proyectonan na beneficio di nos comunidad.



LOTTO 5

Cuminsando cu 4 florin, bo por gana e suma grandi aki

Afl. 320.000,-

Obtenibel na cualkier rebendado di Lotto.

sorteo ta awe nochi 7:45 pm



HUNGA AWO



DVG ta informa

DVG ta monitor desaroyonan internacional relaciona cu Ebola

Directie Volksgezondheid (DVG) kier informa comunidad cu nos ta monitor activamente e desaroyonan internacional relaciona cu e brote di Ebola actualmente na Republica Democratico di Congo (Africa) y Uganda, despues cu recientemente World Health Organization (WHO) a declara e situacion como un emergencia di salud publico di importancia internacional (na Ingles: “Public Health Emergency of International Concern” (PHEIC)).

Un declaracion di “Emergencia di Salud Publico di importancia internacional” ta wordo haci ora un brote

tin potencial pa afecta varios pais y ta rekeri coordinacion internacional pa limita propagacion di e malesa y proteha salud publico mundial.

Ebola (Bundibugyo virus) ta un malesa viral hemoragico severo y hopi biaha fatal. E ta un malesa zoonotico cu ta wordo transmiti di animal pa hende. Infeccion humano ta sucede ora di contacto directo cu sanger of fluido corporal di un persona of animal infecta.

Na Aruba no tin ningun caso di Ebola registra ni reporta y no tin indicacion di un menasa directo pa comunidad local. Sin embargo, DVG ta sigui evalua cualkier posible riesgo pa Aruba y ta man-


tene contacto cu partnernan regional y internacional pa permanece informa riba tur desaroyo relevante.

DVG ta recorda comunidad pa sigui solamente canalnan oficial di informacion manera Directie Volksgezondheid y World Health Organization (WHO), pa evita desinformacion y preocupacion innecesario.

Si situacion internacional cambia of si tin informacion relevante pa Aruba, DVG lo informa comunidad debidamente.

Pa mas informacion, like nos Facebook page Directie Volksgezondheid DVG Aruba, follow nos riba Instagram direc-

Figure 1. Health Zones affected by Bundibugyo virus disease in Democratic Republic of Congo, as of May 2026



tie_volksgezondheid_aruba, sigui nos den WhatsApp Channel, ricibi tur informacion den Aruba Health App,

bishita www.dvg.aw, yama 5224200 of manda email na servicio@dvg.aw

WHO: Brote di Ebola y hantavirus ta señal di “temponan peligroso”



(AFP) - E brotenan mortal di hantavirus y Ebola ta solamente e crisisnan mas recien den “temponan peligroso y decisivo”, World Health Organization su hefe a bisa dialuna.

Habriendo e cuerpo su asamblea anual di tuma decision na Geneva, Tedros Adhanom Ghebreyesus a papia tocante e brote di Ebola nobo den Republica Democratico di Congo, cual el a declara un emergencia di salud internacional durante fin di siman, y e brote incomun di hantavirus riba e crucero MV Hondius.

E dos “ta solamente e crisis mas recien den nos mundo preocupa,” el a bisa e reunion cu presencia di ministernan di salud y delegado di alto nivel for di rond di mundo. “For di conflicto na crisis economico na cambio di clima y recorte den sosten, nos ta biba den temponan dificil, peligroso y divisivo,” Tedros, ken ta anticipa di elabora riba e riesgonan durante su speech principal na e asamblea di Salud Mundial a expresa diamars mainta. Prome minister Spaño Pedro Sanchez, ken su pais ta elogia pa permiti MV Hondius para

na su territorio Islanan Canaria siman pasa pa e evacuacion di pasaheronan y tripulacion, a enfatisa cu “proteccion di otronan ta e miho arma pa proteha nos mes. Ningun pais por salba su mes” su so, el a bisa den un speech sorpresa na e asamblea, ricibiendo aplauso.

Actualmente, “defende sentido comun a bira un forma di rebelion,” el a acusa, lamentando un “pandemia di egoismo” andando.

World Health Assembly 2026 ta bini despues di un aña particularmente dificil pa WHO,

debilita pa e retiro anuncia di Merca y recorte profundo di financiamiento. “WHO su presupuesto a keda reduci cu alrededor di 21%, of casi 1 billion dollar. Centenares di trabao a keda elimina, programanan a keda reduci,” minister di Salud Suiso Elisabeth Baume-Schneider a nota den su speech. “WHO mester a, y por a, pasa den reforma profundo den medio di emer-

gencia.”

Suerie Moon, co-director di Global Health Centre na Geneva Graduate Institute, tambe a sugeri cu WHO a wanta e tormenta y cu e crisis di hantavirus a provee “un ilustracion cla di dicon mundo mester di un WHO confiable, imparcial y cu financiamiento confiable,” el a agrega.

FOR SALE

DICK'S MACHINE SHOP

MILLING MACHINES-GREAT FOR SCHOFFING HEADS

LATHE - FOR DRUMS/SHAFTS-BEARING

GRINDERS-ALL KINDS

TOO MUCH TO LIST

CALL FOR INFO

DICK PLANTE

267F POS CHIQUITO, ARUBA

593 7090

Keda alerta pa estafa riba rednan social!

No click riba aviso paga (sponsored ad) cu ta usando imagen di Aruba Today.
Bishita solamente e pagina oficial di Facebook, Aruba Today News, of e website
www.arubatoday.com.

Si bo haya algun problema, nos t'ey pa yuda: bondia.aruba@gmail.com

CuraPlus ta pone atencion riba salud sexual y conscientisacion di HIV na Corsou

(Curacaochronicle) - Representanten di Fundacion CuraPlus Sexual Health a reuni cu Maurits de Kort riba 11 di mei pa discuti consciencia di salud sexual, prevencion di HIV y retonan di salud publico cu Corsou ta enfrenta.

Delegacion a inclui Dudley Raimundo Ferdinandus-Tavera Salazar, director ehecutivo y consehero di HIV di CuraPlus, hunto cu Martinus Antonius "Mario" Kleinmoedig, encargado di relacionnan publico y asesor di e fundacion. Durante e reunion na oficina di Gobernador, CuraPlus a presenta informacion tocante su proyectonan y trabao continuo den comunidad.

E organizacion ta enfoca riba brinda apoyo na personanan cu ta biba cu HIV/AIDS mientras cu tambe ta promove servicionan di cuida medico innovador y di halto calidad. CuraPlus tambe ta

envolvi den educacion publico tocante prevencion, tratamento, conseho y cuida posterior relaciona cu salud sexual y conscientisacion di HIV.

Segun informacion comparti durante e bishita, e fundacion a enfatisa e importancia social mas amplio di su trabao, mas aya di solamente apoyo medico.

CuraPlus a bisa cu aumenta conscientisacion tocante salud sexual, reduci stigma rond di HIV/AIDS y anima acceso rapido na informacion y servicionan medico ta sigui esencial pa mehora resultado di salud publico riba e isla. E organizacion a nota cu campaña efectivo di educacion y prevencion por contribui na deteccion mas tempran, miho resultado di salud y un sociedad mas sano en general. Un tema importante discuti durante e reunion tabata si informacion medico disponible realmente ta yega na



e gruponan obhetivo.

Segun CuraPlus, segura cu informacion confiable di salud y mensahenan di prevencion ta yega na e personanan cu mas mester di dje ta keda un reto grandi. E organizacion a enfatisa cu alcanza diferente gruponan den sociedad ta exige atencion continuo y cooperacion amplio.

Discusionnan tambe a trata posible riesgonan di salud publico y preocupacion aparente falta di un politica cla tocante prostitucion na Corsou. Participantenan a enfatisa cu e asuntonan aki ta exige atencion continuo tanto for di perspectiva di cuida medico como di prevencion.

Gobernador De Kort a expresa aprecio pa iniciativa-

nan presenta pa CuraPlus y a reconoce contribucion di fundacion na salud y bienestar di comunidad di Corsou. Segun Oficina di Gobernador, De Kort a enfatisa importancia di organisacionnan dedica na prevencion, cuida medico y conscientisacion publico, y a expresa apoyo pa esfuersonan dirigi riba promove un sociedad sano y bon informa.

Sistema hudicial di Corsou ainda ta bao presion a pesar di reformanan, Consejo di Supervision ta adverti

(Curacaochronicle) - Sistema hudicial di Corsou ta sigui enfrenta problemanan structural serio a pesar di añanan di plan di reforma, inversionnan y agenda di politica. E conclusion ey ta den e rapport "Estado di Aplicacion di Ley 2025" recientemente publica pa Consejo pa Aplicacion di Ley di Reino Hulandes.

Segun e rapport, scarsedad di personal, capacidad limita di ehecucion, legislacion desactualisa y implementacion debil ta sigui debilita efectividad di aplicacion di ley y funcionamiento di cadena hudicial riba e isla.

E consejo a bisa cu aunke Corsou a desaroya varios plan



di politica, sistema di monitoreo, dashboard y agenda di reforma, implementacion practico di e plannan aki ta keda atras.

E rapport especificamente ta

enfoca riba retrasonan den e pakete di reforma di Reino, conoci como Landspakket, unda expansion di personal priminti den e "sectornan duro" di husticia — incluyendo polis y sistema carce-

lario — den gran parti no a materialisa.

E consejo tambe a adverti cu e sistema di monitoreo so no lo soluciona e problema si institucionnan gubernamental ta continua falta personal y experticio necesario pa ehecuta reformanan.

Segun e rapport, sector hudicial di Corsou ta sigui depende fuertemente riba un cantidad chikito di individuo cu ta maneha multiple proyecto di reforma simultaneamente mientras tambe ta cumpli cu nan debernan regular.

E consejo a enfatisa ademas cu proteccion di orden publico y estado di derecho den parti Caribeño di Reino

awor mester ser mira como un asunto strategico di seguridad cu ta exige inversionnan a largo plazo y gobernacion mas fuerte.

Yuda FUDA cu un Wensambulans pa Aruba!

Donacion: CMB#65550908

Tur beneficiado ta haya un beer!

Mamanan di Stadskanaal acusa di abuso severo di mucha a ser denuncia na instancianan di ayudo 15 luna pasa

(NLTimes) - **Organisacionnan di ayudo na Hulanda tabata sa di posible maltrato di dos mucha na Stadskanaal por lo menos 15 luna prome cu autoridadnan a interveni. E caso a bira noticia nacional despues cu un tribunal di menor a revela e abuso horibel cu un mucha muhe di 6 aña y su ruman homber di 7 aña a sufri. Alegadamente, nan tabata ser laga sin cuminda, cera den un kelder y humilia den video pa nan mamanan.**

E mucha muhe a sufri e maltrato mas severo. Na principio di e aña aki el a ser hospitalisa y poni den coma induci despues di ser bati severamente. Documentonan di tribunal ta bisa cu su mama a fors'e pa come su propio sacramento, a batie cu palo di basora y scop e repetidamente.

Corant AD a reporta cu varios organisacion di ayudo tabata involvi cu e famianan hopi prome cu e abuso a bira

publico. Sinembargo, ningun di e organisacionnan no a acepta responsabilidad, pero mas bien a señala falta di otro agencia.

William Schrikker Foundation (WSS), cu a cuminsa involucra su mes cu e caso na maart 2026 despues di un orden di supervision di tribunal, a bisa cu nan a entrega denuncia na polis contra ambos mama. Segun WSS, esey a contribui na e investigacion criminal cu awor ta andando. E fundacion tambe a pidi pa kita e muchanan for di cas di nan mama, algo cu mientras tanto a sucede.

WSS a declara cu Inspectorado di Salubridad y Cuido di Hoben awor ta investiga e calidad di cuido ofreci pa e agencianan cu a mancha e caso prome, indirectamente refiriendo na Veilig Thuis Groningen (VTG) y Jeugdbescherming Noord (JN).

Veilig Thuis, e centro Hulandes pa reporta abuso di mucha y violencia domestico, a confirma cu nan a ricibi varios



reportahe tocante e muchanan y a afirma cu accion inmediato a ser tuma cada biaha. Un di e reportahenan a bin di scol di e mucha muhe na november 2025 despues cu el a yega cu herida na su cabes y a bisa cu su mama a batie cu un palo di basora. Sinembargo, e organisacion no a splica ki accion a ser tuma despues.

Segun ley Hulandes, proveedor di cuido mester informa Inspectorado di Salubridad y Cuido di Hoben inmediatamente si nan sospecha abuso of negligencia di mu-

cha. Inspectorado a bisa AD cu nan solamente a ricibi reportahe oficial di VTG y JN diaranson pasa, poco despues cu caso a bira publico.

VTG a bisa cu nan mes a cuminsa un investigacion interno den e famianan anteriormente, pero no a duna hopi detaye. Un vocero a bisa cu e investigacion a resulta den un rapport cu "recomendacionnan cla" comparti cu partnernan relevante, aunke nan no a revela nomber ni fechanan.

E caso a intensifica critica contra Veilig Thuis y e sistema Hulandes di proteccion di mucha. Asociacion di Abogadonan Hulandes pa Menornan (VNJ) y Asociacion di Abogadonan Social na Hulanda (VSAN) a bisa na De Telegraaf cu casonan serio di abuso di mucha hopi biaha ta dura demasiado largo sin solucion pa motibo di sobrecarga di trabao.

Segun ley, Veilig Thuis mester determina den cinco dia si un mucha ta sigur despues di ricibi un reportahe di abuso. Segun representante di VSAN, Reinier Feiner, hopi biaha e fecha limite no ta ser cumpli pa motibo di e gran cantidad di reportahenan. El a adverti cu casonan serio di abuso por perde den sistema pasobra e agencianan no por mancha tur e kehonan.

Autoridadnan a bisa cu e enfoque principal awor ta proteha e dos muchanan y garantiza un investigacion independiente tocante con e abuso por a continua tanto tempo sin ser para.

Gobierno Hulandes ta priminti un "team di experto" pa yuda municipalidadnan habri refugio pa solicitante di asilo

(NLTimes) - **Gobierno Hulandes ta creando un organisacion special pa duna sosten na municipalidadnan den habrimento di refugionan pa solicitantenan di asilo, prome minister Rob Jetten a priminti despues di un reunion di emergencia cu municipalidadnan despues di e disturbionan reciente. E "team mobiel" aki lo yuda municipalidadnan cu ta dispuesto pa ricibi solicitantenan di asilo cu "solucionnan mas adapta," Jetten a bisa despues di e reunion na Catshuis, residencia oficial di e prome minister na Den Haag, segun NOS.**

Asociacion di municipalidadnan Hulandes, VNG, a pidi e reunion aki despues di disturbionan reciente den diferente municipio rond di plannan pa habri refugionan pa solicitantenan di asilo.

Sharon Dijksma, presidente di VNG y alcalde di Utrecht, a participa den e reunion na nomber di VNG. "Particularmente municipalidadnan

chikito ta cargando cu hopi presion," el a bisa NOS despues di e reunion. P'esey VNG a yega na un acuerdo cu gabinete cu nan lo ricibi asistencia di expertonan y apoyo financiero pa sigura cu apertura di e refugionan aki "baha suave den comunidad," Dijksma a bisa.

E ta satisfecho cu e manera cu e reunion a bay. "Mi a bisa anteriormente cu mi tabata kier apoyo di e gabinete y cu ministerionan mester a tuma iniciativa. Nan a haci esey awe anochi," el a bisa.

"Nos mester preveni cu alcaldenan ta bisa: nos ta completamente so," Jetten a bisa despues di e reunion cu Dijksma. El a condena e violencia reciente, bisando cu nan ta "bay mucho mas leu di tur limite" y cu e esnan cu ta protesta di forma violento lo ser trata cu severidad.

Ya pa siman tin protestanan violento contra aceptacion di solicitantenan di asilo na Hulanda. Na Loosdrecht, por ehempel, e manifestantenan a reuni tur anochi durante un



luna dilanti di cas di pueblo di Wijdemeren pa protesta contra e decision di e municipio pa hospeda solicitantenan di asilo den un edificio parcialmente bashi. Protestanan a escala varios biaha den disturbio, culminando cu manifestantenan violento purbando di pega candela na edificio cu solicitantenan di asilo aden siman pasa.

E alcaldenan a critica e gabinete fuertemente, bisando cu municipalidadnan ta haciendo loke gobierno ta pidi nan

haci door di ricibi solicitantenan di asilo. A cambio, nan ta enfrentando "intimidacion, menasa, violencia y disturbionan organisa," mientras e gabinete ta keda keto.

Na mesun momento, e centro di recepcion pa solicitantenan di asilo na Ter Apel ta sobrecarga atrobe pa lunas caba, y hende ta atrobe drumi riba stoelnan den sala di espera y gang. COA a bisa di aluna cu ainda no a yega e punto unda hende ta drumi pafo. "Pero nos tin menos

opcion tocante unda bo pone ken," un vocero di COA a bisa ANP.

"Nos mester move hende constantemente. Supone un famia di seis persona ta den un cuarto destina pa ocho hende. Bo ta agrega dos hombre soltero eyan? Si nos ta yen, bo lo yega na e punto unda esey ta necesario. Esaki ta bay na costo di habitabilidad y seguridad." Segun COA, e refugionan actual pa solicitantenan di asilo na Hulanda ta "104% yen.

Canasta alimentario di famianan Venezolano a aumenta cu 5,5% na april

(Infobae) - Durante e ultimo luna, famianan tabatin mester di \$38,27 adicional compara cu maart.

Canasta alimentario pa un famia di cinco persona na Venezuela a yega na \$730,59 na april, loke ta representa un aumento di 5,5% compara cu maart, segun datonan di Centro di Documentacion y Analisis Social di Federacion Venezolano di Maestronan (Cendas-FVM).

Pa e ultimo luna, un famia tabatin mester di \$38,27 adicional compara cu maart, ora e Canasta tabata costa \$692,32, segun e mesun organizacion. E rapport tambe ta nota cu un famia a destina \$13,33 pa cumpra awa potable, pasobra e recurso suministra via tu-

beria den e pais no ta cumpli cu normanan basico di potabilidad, segun expertonan y organisacionnan no-gubernamental.

E Constitucion Venezolano ta reconoce derecho di cada trahador pa ricibi un salario "suficiente pa permitie biba cu dignidad y cubri necesidadnan material, social y intelectual basico p'e y su famia".

Sinembargo, Cendas ta reporta cu salario minimo, cu a keda congela desde 2022 na 130 bolivar pa luna (actualmente ekivalente na mas o menos 25 cen di dollar), ta cubri solamente 0,03% di e Canasta.

Den ultimo añanan, e Ehec-

utivo a concentra su politica salarial riba entrega di dos bonus pa empleado publico, sin impacto riba otro beneficianan laboral, cu hunto ta suma \$240: un di \$40 pa alimento y otro di \$200 conoci como "bonus contra guerra economico", tur dos paga den bolivar segun tasa oficial actual.

Cifranan oficial ta indica cu prijsnan a subi cu 10,6% na april, cu un inflacion acumulada di 90% den e prome cuatro luna di aña.

Trahadornan y sindicalistanan di diferente sector ta rechasa politica di bonus salarial y ta exige aumento di salario.

Asociacion di Profesornan di Universidad Central di Ven-



euela (APUCV), institucion principal di educacion superior den e pais, a reitera diahuebs pasa su yamada pa un paro nacional di 24 ora den universidadnan publico pa diamars, despues cu gobierno a nenga atende e peticion.

E asociacion ta exige, ademas di salarionan digno, regularizacion "inmediato" di pago di Bono di Responsabilidad Profesional, advirtiendo cu "apenas aproximadamente 25% di profesor universitario a cobra esaki".

Tension ta continua na La Paz y El Alto despues di un dia di violencia contra gobierno di presidente Rodrigo Paz

(Infobae) - Diahuebs tabatin enfrentamentonan, hortamento y atakenan contra institucionnan publico den centro di La Paz. Gobierno a nenga pa declara estado di emergencia y ta bet riba fortalece control di forsanan di seguridad.

Dialuna a ser marca pa violencia na La Paz, unda manifestacionnan di diferente sector a exige renuncia di presidente Rodrigo Paz apenas seis luna despues di asumi poder. Plasa Murillo, epicentro di poder politico, tabata sitio pa gruponan violento cu a purba kibra defensa policial cu enfrentamentonan y explosionnan di dinamita durante mas cu cinco ora.

Medionan local a reporta cu tabatin hortamento y atakenan contra institucionnan publico, manera Tribunal Departamental di Husticia y oficina di Derechos Reales. Un vehiculo policial di e Fuerza Especial di Lucha Contra el Crimen (Felcc) tambe a ser kima, un stacion di teleferico na El Alto a ser ataca y tabatin agresionnan contra periodistanan y ciudadanonan.

Videonan circulando riba rednan social ta muestra atakenan contra bendedornan y pasaheronan di transporte publico. Den un video cu a bira viral riba rednan social, un muhe cu lagrima den wowonan a denuncia cu



manifestantenan a horta su mercancia y cu el a perde tur loke e tabatin.

Cu caos andando, Policia a dispersa manifestantenan cu gas lagrimogeno y a evacua espacionan publico manera universidadnan y edificio di Poder Legislativo pa evita aumento di disturbionan.

Segun reportahenan di prensa local, entre manifestantenan tabatin miembronan di cooperativanan minero, integrantes di organizacion indigena Ponchos Rojos, sindicatonan afilia na Central Obrera Boliviana (COB), maestronan rural y siguidornan di ex-presidente Evo Morales (2006-2019), kende a yega na sede di gobierno despues di un caminata di 190 kilometer.

Debi na escalacion di tension,

gobierno a nenga pa declara un estado di excepcion y a dicidi reforsa control policial y militar. "Den un reunion di evaluacion cu polis y forsan arma, a determina cu medidanan di seguridad lo ser reforsa y criminalnan lo ser busca; nos no lo laga nan cana liber," minister di Gobierno (Interior), Marco Antonio Oviedo, a bisa na media. Minister a sigura cu "medidanan duro y estricto" lo ser tuma, pero a afirma cu "no tin posibilidad di un estado di excepcion, nos no lo decreta esaki".

Vice-minister di Defensa Social, Ernesto Justiniano, a categorisa protestanan entre esnan cu tin demanda legitimo y gruponan cu ta busca pa destabilisa gobierno cu violencia. Den un entrevista cu radio Duty, Justiniano a bisa

cu "tin protestanan pacifico, y gobierno ta atiendo nan pa varios siman caba, y otro ta violencia cu no lo haya consideracion den aplicacion di ley", y a añadi cu nan no lo permiti violencia "ser disfrasa como demanda social".

Segun e vice-minister, e manifestacionnan di ayera a laga por lo menos dies herida, incluyendo polis y civil, y 69 persona deteni.

Aunke tin intentonan di mediacion pa organisacionnan manera Defensoria del Pueblo, Asamblea Permanente de Derechos Humanos y Iglesia Catolico, entre otro, e conflictonan ta parece ainda hopi leu di haya solucion.

Diamars tin 32 punto di blokeo registra, concentra den departamentonan di

Oruro, La Paz y Cochabamba, y mas sectornan social ta uniendo na protestanan, manera transportistanan di El Alto cu a cuminsa un paro "indefini" for di awe.

Segun reportahenan local, den oranan tempran di diamars, ciudadnan di La Paz y El Alto ainda tabatin algun punto di blokeo, cu transporte publico interumpi y lesnan suspendi na algun scol. Ademas, tin scarsedad y aumento den costo di alimento basico.

Den e caos di manifestacionnan aki, algun analista ta mira cu fuera di demandanan sindical tin un conflicto mas profundo: demanda di algun organisacionnan social pa ser inclui den tumamento di decision.

Pablo Deheza, columnista y analista politico, a bisa den un entrevista cu Infobae cu "si no atende e conflicto profundo, esaki ta un preludio di dos of tres episodio mas cu gobierno no lo por resisti".

Memey di e escenario aki, por lo menos nueve pais a expresa nan apoyo pa gobierno di Paz — Argentina, Chile, Costa Rica, Ecuador, Guatemala, Panama, Paraguay y Peru — mientras cu 31 ex-presidente di grupo Idea y Consejo Permanente di Organizacion di Estadonan Americano (OEA) a programa un sesion extraordinario pa diaranson pa evalua situacion politico y social cu pais ta pasando aden.

Cuba:

Segun Trump, yega na un acuerdo diplomatico no lo ta difícil

(CiberCuba) - Presidente Donald Trump a afirma ayera, for di e obranan di remodelacion di e hala oost di e Cas Blanco (White House), cu e ta considera posibel pa yega na un acuerdo diplomatico cu Cuba y a describi di forma duro e crisis humanitario cu e isla ta biba.

“Na Cuba nan no por cende luz. Nan no por come. Nos no kier mira esey,” Trump a bisa periodista Shelby Talcott.

E declaracionnan a sali como respuesta riba preguntanan di periodistanan tocante e posibilidad di un comprendemento cu e regimen Cubano, den un momento cu e relacionnan entre Washington y La Habana ta pasando den un tension creciente sin precedente.

“Cu Cuba, mi ta kere cu si. Si, mi ta kere cu si,” Trump a

contesta ora cu nan a puntr’e tocante un posible acuerdo diplomatico.

E mandatario a elogia e Cubano-Americanonan, di kende el a bisa cu el a ricibi 97% di e votonan, y a reafirma su disposicion pa actua den nan favor: “Nan tin familiar na Cuba. Nan a ser trata hopi, hopi malo. Nos lo resolve esey. No lo ta difícil pa nos resolve esey.”

Ora un periodista a puntr’e si e por logra esey sin cambia e regimen, Trump a responde: “Mi no sa tocante cambia e regimen. Mi por hacie, cu cambio of sin cambio di regimen. Tabata un regimen duro. Nan a mata hopi hende, pero ta un pais cu realmente mester ayudo. E no tin nada.”

E palabranan di e presidente ta contrasta cu e tono mas skeptico di su Secretario di Estado, Marco Rubio, kende



a declara siman pasa na Fox News: “Nos lo duna nan un oportunidad. Pero mi no ta kere cu lo sucede. Mi no ta kere cu nos por cambia e direccion di Cuba mientras cu e personanan aki ta na poder.”

E declaracionnan di Trump ta yega un dia despues cu e revista Politico a revela cu e administracion ta studia opcionnan militar contra Cuba, for di atakenan aereo puntual te na un invasion terrestre,

despues cu e campaña di presion economico a faya.

E contexto diplomatico anterior ta inclui movimentonan di nivel halto: riba 14 di mei, e director di CIA, John Ratcliffe, a bishita La Habana — e contacto directo di nivel mas halto entre ambos pais riba teritorio Cubano desde 2016 — y a reuni cu e minister di Interior Cubano y cu Raúl Guillermo Rodríguez Castro, nieto di Raúl Castro.

Riba 12 di mei, Trump a publica riba Truth Social: “Cuba ta pidi ayudo, y nos lo papia!”, mientras cu e mandatario Cubano Bruno Rodríguez a admiti cu nan a cuminsa “un proceso di intercambio” cu Washington.

Na e presion diplomatico y militar ta agrega presion hudiacial: Departamento di Justicia ta prepara un acusacion penal contra Raúl Castro, di 94 aña, pa e deriva e avioneta nan di Hermanos al Rescate riba 24 di februari 1996, den cual cuatro persona a perde bida.

Presidente Cubano Miguel Díaz-Canel a adverti dialuna cu un agresion militar Mericano “lo provoca un baño di sanger cu consecuencianan incalculabel,” mientras Trump ta insisti cu resolve e situacion di Cuba “no lo ta difícil.”

Jamaica: Chauffeurnan di taxi no ta di acuerdo pa parti e aumento di tarifa di 16%

(JamaicaObserver) - Operadornan di taxi cu tabata wardando un aumento di 16% den tarifa desde dos aña pasa, a muestra nan descontento despues di un reunion cu autoridnan di transporte y finanzas, cu a pidi mas tempo pa entrega e promesa cu ainda no a ser cumpli.

E conductornan a argumenta cu mientras prijsnan ta sigui subi pa motibo di tensionnan geopolitico mundial, specialmente e conflicto entre Merca, Israel y Iran, nan no ta dispuesto pa sigui warda ni acepta un aumento den parti.

Secretario general di National Council of Taxi Associations, Fredrick Bryan, a bisa cu e gastonan diario di operacion awor ta consumi mas cu 60% di nan entrada. Segun e, tur cos ta subi rapidamente y esaki ta pone operadornan den un posicion difícil.

“Nos tambe tin famia y nos ta sinti e aumentonan diario. Un aumento den dos parti no tin sentido,” Bryan a bisa.

Bryan tabata entre varios conductor di taxi cu a reuni na Half-Way-Tree Transport Centre na St Andrew pa un conferencia di prensa cu

minister di Transporte Daryl Vaz y minister di Finanzas Fayval Williams. E reunion a bin despues di preocupacion tocante posible interrupcion di servicio pa transporte publico.

Vaz a recorda cu gobierno a aproba un aumento di 35% den october 2023, pero solamente 19% a ser implementa. E otro 16% tabata programa pa april 2024, pero a ser posponi pa motibo di diferente crisis economico.

E minister a bisa cu gobierno lo hiba e asunto dilanti gabinete pa dicidi si e aumento lo ser implementa completamente of den fasenan.

Bryan, sinembargo, a bisa cu no mester tin debate tocante e 16%, pasobra operadornan a warda demasiado largo. El a bisa cu normalmente cada dos aña mester revisa e tarifa, pero despues di tres aña nan ainda nan no a ricibi e total di e aumento aproba.

Presidente di Transport Operators Development Sustainable Services (TODSS), Egerton Newman, tambe a expresa su oposicion contra un aumento den dos parti. El a bisa cu e costo di bida a subi dobel y hasta tripel, no



solamente pa gasolin pero pa hopi otro gasto.

“Despues di tanto tempo, nos no por caba cu ocho plus ocho. E situacion den pais ta hopi serio pa operadornan,” Newman a bisa.

Vaz a reconoce cu e espera tabata demasiado largo y cu conductornan di taxi ta sinti impacto di e aumentonan di prijs. Pero el a insisti cu gobierno mester tuma un decision cu cautela despues di deliberacionnan den Parlamento riba 1 di juni 2026.

El a menciona varios evento

inespera cu a afecta e posibilidad pa implementa e aumento, incluyendo e secuelanan di pandemia di COVID-19, horcan Beryl den 2024, horcan Melissa den 2025 y awor e conflicto den Medio Oriente.

Segun Vaz, e guerra den Medio Oriente a obliga Petrojam absorbe casi \$4 miljard den perdida pa mantene e aumento di gasolin controla. El a splica cu actualmente tin un mecanismo cu ta limita aumento semanal di prijs di combustibel na \$4.50 pa liter, aunke e aumento real por yega te \$12.50 pa liter.

“Nos ta trata di balansa un situacion delicado. Aunke e 16% ainda no a ser entrega, gobierno a proteha conductornan parcialmente cu su maneho di e aumentonan di prijs,” Vaz a bisa.

Pero presidente di Southern Taxi Association den St Elizabeth, Charles Powell, a mantene cu e aumento completo di 16% ta absolutamente necesario. El a expresa speranza cu e fecha limite di 1 di juni realmente lo ser cumpli pa gobierno.

Influencer Gabbie Gonzalez acusa di plania asesinato di cantante Jack Avery

(TMZ) - Influencer di TikTok Gabbie Gonzalez ta acusa den un supuesto plan pa asesina e tata di su yiu muhe, cantante Jack Avery y TMZ a haya sa cu su tata tambe ta bao detencion pa e supuesto plan.

Fuente di autoridad a bisa cu Gonzalez a ser procesa diamars na L.A County pa conspiracion di comete asesinato. Tambe a haya sa cu su tata, Francisco Gonzalez, a keda aresta dialuna na Florida, pa e mesun crimen.

Segun L.A County su departamento di polis, Gabbie tabata den un bataya di custodia cu Jack tocante nan yiu muhe di 7 aña, Lavender, y Gabbie su tata tambe a keda involucra den e disputa.

Un testigo a bisa polis cu Francisco a bisa lo ta mas cheap si Jack tabata morto.

Jack ta un ex miembro di e grupo Why Don't We.

TMZ a reporta anteriormente cu a aresta Gabbie siman pasa na Humboldt County, CA mientras e tabata abordo di un vuelo aya, y a keda transferi dialuna na Los Angeles County, unda e ta keda den prison sin posibilidad di libertad. Su tata no a keda extradita na L.A. y ta keda bao detencion.

Aparentemente autoridadnan - oficialnan federal y local - ta trahando riba e caso aki pa un tempo caba. September ultimo, Jack a haci un entrevista unda el a papia tocante agencianan di FBI cu a presenta na su cas y inform'e cu un persona ta purbando di mat'e.


Sinembargo, Jack claramente no tabata sa tocante Gabbie su supuesto rol den esaki, pa motibo cu el a elogi'e pa ta un bon mama na nan yiu muhe.

Segun polis, Francisco a crea un plan den 2021 pa monitor y saca potret di Jack na Hawaii unda e ta biba. E supuesto plan tabata pa haya imagennan di su persona ta haci cosnan manera huma y bebe cu por caus'e daño den e disputa di custodia.

Den un supuesto comunicacion entre Gonzales su famia, Francisco a skirbi, "Yama Barca ... nunca ta mucho trempan."


Autoridadnan ta kere cu esaki ta referi na un homber yama Dustin Barca y polis ta bisa cu Gabbie y su amigo Kai Cordrey a purba recluta Barca pa menasa Jack.

Segun polis, un testigo a bisa nan cu Gabbie a bisa su tata a paga electronicamente \$10.000 na Kai dia 26 di april den 2021 pa loke a describi como "pago pa desaroyo di website." Sinembargo, Kai



despues a bisa polis cu esaki tabata djis un cobertura .. cu e no a realmente haci ningun servicio di website.

Usando informacion di Kai, un agente federal a gana di ta e persona cu lo contrata pa e asesinato y a participa den un yamada cu Francisco. Durante e yamada ey, polis a bisa cu Francisco a laga cla cu e lo haci pago y papia tocante e blanco.



Gabbie a crea un base di siguidor riba rednan social via publicacionnan di estilo di bida, videonan di biahe y tambe contenido cu tabata ilustra su bida diario y bida como mama.

Jack Avery a pidi corte pa dun'e proteccion y e custodia legal y fisico di su yiu muhe.

E ex cantante di e banda a presenta na corte ayera y a pidi un orden di restriccio contra Gabbie. Den e documentonan cu TMZ a obtene, Jack ta bisa cu Lavender tabata kedando cu un famia di cuida despues cu a aresta Gabbie y cu e mester a bay Northern California pa cuid'e. Ora cu el a yega, segun e ta conta, a bis'e cu Lavender a haci comentarionan cu ta culpa e pa e aresto di su mama y e ta acusa cu Gabbie ta papiando malo di e dilanti nan yiu.

Desde Gabbie su aresto, su famia ta yamando Jack exigiendo pa sa unda Lavender ta y e ta bisa cu Diasabra, 2 di Gabbie su amigonan a bay

su cas y cuminsa bati e porta, wantando su camara y bisando e cu "nos por haci esaki henter dia." E ta bisa cu e no ta sinti cu e y Lavender ta safe den su cas.

Ademas, Jack ta bisa cu Gabbie a hiba Lavender rond di mundo prome cu su aresto, rechasando bis'e unda nan lo bay. E ta bisa cu e no tabata informa cu nan ta na NorCal te cu Gabbie a keda aresta.

Jack te hasta ta bisa cu FBI a adverti su persona 5 aña atras cu e no ta safe cerca di Gabbie, pero ta bisa cu e kier a wak su yiu y "mester a siña con pa maneha su propio miedonan y ansiedad" durante bishitanan di custodia y intercambio.

Gabbie lo keda bao aresto y ta pendiente pa presenta den corte awe tardi y Jack t bisa cu e no kier pa Gabbie tin bishita cu Lavender den bista di e proceso criminal andando.

Marca di Kim Kardashian ta aclara cu e no tin conexio cu trafico di droga

(TMZ) - Kim Kardashian su marca di paña interior, SKIMS, ta lagando sumamente cla cu e no tabatin nada di haber cu e operacion di trafico di cocaina grandi na Inglaterra, despues cu e compania su carga di paña tabata conecta na un traficante di droga condena.

Un representante di SKIMS a bisa TMZ cu "SKIMS ta altanto di e noticia reciente tocante e cargamento di nos producto. Nos kier ta absolutamente cla: SKIMS no tabatin ningun conocimiento tocante e actividad criminal aki. Nos no tin ningun conexio na e operacion di trafico, e chauffeur ni e truck."

E declaracion ta bini despues cu a sentencia Jakub Jan Konkel dialuna na Chelmsford Crown Court na 13 aña y 6 luna den prison pa trafico di cocaina.

Segun autoridadnan, Konkel a transporta un trailer cu tabatin 28 palet di paña di SKIMS for di Hulanda pa Inglaterra september ultimo.

Border Force su oficialnan despues a haci un entrada hudicial den e trailer despues cu el a yega e waf di Harwich y a descubri 90 pakete di cocaina cerca di e porta di e trailer. Polis a calcula cu e droga tabatin un balor di alrededor di 9.4 milyon dollar. Oficialnan a enfatisa cu no tin nada ilegal tocante e paña di SKIMS mes, investigadornan a bisa cu simplemente a usa e cargamento pa sconde e droga.

Konkel inicialmente a rechasa conocimiento di e droga, pero despues a admiti cu el a acepta trafica e cocaina pa alrededor di \$5.300 prome cu el a declara su mes culpable den corte.



Wij zoeken nieuwe collega's

- Econoom
- Ingenieur

Voor informatie over de functiebeschrijving en de vereisten kunt u op de onderstaande link klikken. Stuur uw motivatiebrief en bijbehorend cv, gericht aan dhr. E. Kross vacature@aftaaw, uiterlijk 31 mei 2026.

Werken met
impact



ARUBA
FAIRTRADE
AUTHORITY

Heredero di Mango libera bao fianza despues di aresto pa morto di su tata

(AFP) - Yiu mayor di Isak Andic, fundador di imperio di paña Spaño, Mango, a keda den libertad diamars despues di paga un fianza di un miyon euro despues di su aresto relaciona cu un investigacion di asesinato tocante morto di su tata na 2024.

Despues di keda deteni pa polis diamars mainta y hiba corte man na boei pa interrogacion, Jonathan Andic a sali di corte na Martorell den nort oriente di Spaña, unda e tabata compana pa su abogado, segun un reportero di AFP na e escena. E no a contesta pregunta di periodistanan.

A ordena Andic, 45, pa entrega su paspoort, presenta semanalmente dilanti corte, y a keda prohibi di bandona e pais, corte a bisa den un declaracion, agregando cu e caso ta siendo "investiga como cargo di homicidio."

Segun orden di hues, mira diamars pa AFP, tabatin "suficiente evidencia" pa sospecha cu Jonathan a mata su tata den un manera premedita. A menciona su supuesto "obsesion cu placa," un relacion bao presion, y contradiccion den su relato di loke a sucede.

Jonathan tabata su so cu su tata biyonario di 71 aña di edad, na momento cu e fundador di e imperio di paña a cay na e montañanan di Monserrat cerca di Barcelona dia 14 di december 2024. Segun e rapport forensico, manera cita den e orden diamars, e

caida tabata "comosifuera el a bay den un slide, pia prome."

Na momento di morto di Isak, autoridadnan a bisa cu el a cay di un altura cerca di e cuebanan Salnitre den Collbato, un area marca pa bahadanan skerpi.

Investigadornan inicialmente a trata e morto como un accidente, cu hallazgonan inicial sugeriendo cu Isak, un di e hombernan mas rico di Spaña, por a slip y cay.

Un hues a cera e caso na januari 2025 despues di no haya evidencia di un crimen.

Sinembargo, investigadornan cu cuerpo policial regional di Catalonia, Mossos d'Esquadra, hunto cu fiscal, a habri back e investigacion na october 2025 citando inconsistencia den testimonio di Jonathan, segun reportanenan den medionan di comunicacion.

Tension den famia

Corant Spaño, El Pais a reporta e tempo aya cu autoridadnan a confisca celular di Jonathan Andic tiki despues di e morto.

Tambe a cita testimonio di partner di Isak Andic, golfer profesional Estefania Knuth, describiendo relacion tin biha tenso entre tata y yiu.

Autoridadnan a publica tiki detaye tocante e investigacion, cu ta keda bao secresia hudicial, segun Corte Supremo di Catalonia a bisa diamars.



Jonathan Andic a rechasa di tin responsabilidad pa morto di su tata y a insisti cu e caida tabata accidental.

Un declaracion di e famia ta bisa cu nan tin confiansa "total" den inocencia di Jonathan, agregando cu "no tin, y no ta bay tin, ningun evidencia legitimo contra dje."

Abogado di e famia, Cristobal Martell a yama e teoria di homicidio "incoherente y doloroso," bisando cu e ta "stigmatiza un homber inocente."

Jonathan a cuminsa su carrera profesional na Mango na 2005 despues di studia comunicacion audiovisual na Merca y negoshi na Spaña. El a cuminsa mancha e linea

Mango Man dos aña despues y tabata vice-presidente di e hunta di Mango na momento di morto di su tata.

Fortuna di \$4,5 biyon

Naci na Istanbul, Isak a muda cu su famia pa Barcelona for di Turkia tempo di su adolescencia fin di añanan 1960. El a habri su prome tienda Mango den Paseo de Gracia, caya famoso di compras na Barcelona, na 1984 cu ayudo di su ruman grandi Nahman. E tabata hopi exitoso.

Su marca Mango rapidamente a expande na Spaña y a bira un di e gruponan lider di moda na mundo, cu alrededor di 2,850 tienda mundialmente.

E compania tin presencia den mas di 120 mercado, cu mas di 16,400 empleado mundialmente, segun su website.

Na december 2023, Isak a transferi cinco por ciento di su compania pa prome biaha na un tercero - su man drechi, Toni Ruiz, CEO y actual lider di e grupo.

October ultimo, Ruiz y e otro dos ehecutivo di patrimonio di Isak a duna un declaracion elogiando e legado di loke nan a yama un "empresario visionario" y a bisa cu nan tabata convenci di inocencia di Jonathan.

Tempo di su morto, Forbes a calcula fortuna di Isak na \$4,5 biyon.

Aruba ta conoce e tercer miyonario pa 2026 cu Lotto!

Diabierna anochi 15 di mei tabatin e sorteo miyonario di Mini Mega y Mega Plus. E numbertan ganado di Mini Mega pa diamars anochi tabata: 16-19-22-29 y e Mega Ball: 07 y manera e resultado a wordo procesa a bin haya sa cu tin 1 solo ticket ganado pa Mini Mega y cu e jackpot adicional di Mega Plus cu na total tin e bunita suma di Afl. 1.425.000,-.

Diamars, Aruba ta cera conoci cu e tercer feliz miyonario cu Lotto, e loteria di Aruba pa aña 2026. Luz ta conta cu el

a cumpra su numbertan vast na Kas Ariba Lottery y manera cu a scucha e numbertan ganado tabata sa cu e tabata e ganado. Luz a bay check su ticket pa verifica si tabata berdad y ora el a check su ticket a confirma cu e tin e ticket miyonario cu e suma total di 1 miyon 425 mil florin!

Mini Mega su segundo premio tambe a conoce un total di 4 ganado cu cada uno a gana e bunita suma di Afl.5.473,-. Ticketnan ganado a wordo gana na e siguiente lugarnan: Ritmo Lottery, Indio Stewart Lottery Santa Helena, Lucky

Numbers Eagle y tambe riba Lotto Online.

Lotto, E Loteria di Aruba tin diferente wega, Catochi, Big 4, 1-OFF, Zodiac, Wega di Number di Korsou di Lotto, Lucky 3, Multi-X, Lotto di Dia, Lotto 5, Mini Mega y cu su Mega Plus y e diferente weganan di Raspa y Gana y Instacash. Cumprando Lotto bo ta contribui na deporte riba nos isla. E meta ta pa organisa loteria, cambia bida di su hungadonan y na mes momento inverti den deporte local pa medio di donacionnan na e comision di subsidio.



Empleadonan di Copa Mundial ta menasa cu welga si agentenan di ICE desplega na e sitio

(AFP) - Empleadonan di Los Angeles su SoFi Stadium a priminti dialuna cu nan lo welga si autoridadnan federal di inmigracion desplega na e sitio ora cu e ta anfitrion di weganan di Copa Mundial proximo luna.

E grupo, UNITE HERE Local 11, representando 2.000 empleado di hospitalidad, ta exigiendo garantianan federal cu agentenan di ICE no lo ta usa den ningun di e 8 wega di Copa Mundial den schedule cu lo tuma lugar na e stadion.

Empleadonan na e arena di deporte mas caro na mundo ta bisa cu presencia di ICE lo crea un clima di miedo - pa nan mes y pa fanaticonan. "ICE no mester tin rol den e weganan aki," Isaac Martinez, un chef di e stadion, a bisa na un manifestacion pafo.



"Nos no kier biba cu miedo ora nos bin traha, of miedo di keda deteni ora nos ta bayendo cas. Si nos no yega un acuerdo, mi coleganan y ami ta cla pa welga," Martinez a agrega, papiando di parti di un forsa laboral crea gran-

demente pa empleadonan di bebida y cuminda.

ICE a lidera e operacion den Presidente Donald Trump su accion contra inmigracion.

Gruponan di derecho humano a condena e agencia pa su conducta durante entrada hudicial den varios ciudad Mericano, incluyendo Los Angeles aña pasa.

Den comienso di 2026, ICE su agentenan a los tiro fatal riba 2 manifestante Mericano na Minneapolis.

Empleadonan riba dialuna tambe a bati alarma contra FIFA su proceso di acreditacion, cual ta rekeri empleadonan entrega data personal prome cu e torneo, cual lo core for di dia 11 di juni te cu dia 19 di juli na Merca, Canada y New Mexico.

"Nos ta pidi FIFA pa no comparti nos informacion cu agencianan di ICE, paisnan den exterior of servicionan di inteligencia," empleado Yolanda Fierro a bisa.

You Know VT y Spartans VT ta e campeonnan di Campeonato Nacional

Den e competencia nacional di volleyball - categoria damas y cabayeros A-Klasse - e equiponan di YOU KNOW Volleyball Team (Damas) y SPARTANS Volleyball Team (Cabayeros) a bira e Campeonnan pa loka ta Campeonato Nacional 2025-2026.

Den e categoria di Damas A-Klas YOU KNOW Volleyball Team a enfrenta e damasan di ALL SET Volleyball Team unda den un tremendo "best out of 3 game" e damasan di YOU KNOW a gana 2-0. Ambos wega a bay 5 set unda den tur dos wega YOU KNOW a sa di bay cu e triunfo ganando e setnan hopi preta.

E wega pa campeon a bay cu

e scorenan 25-22 / 25-23 / 28-30 / 23-25 y e ultimo set YOU KNOW a gana 15-12. PABIEN na YOU KNOW Volleyball Team y ALL SET Volleyball Team.

Den categoria di A-klas cabayeros e dos teamnan SPARTANS Volleyball Team y PANTHERS Volleyball Team a topa otro ariba e cancha di Centro Deportivo Betico Croes pa hunga e final.

Den dos salida - "best out of 3 game" - e team di SPARTANS Volleyball Team a vence e team di PANTHERS cu score di 2-0 y asina bay cu e titulo di campeon pa aña 2025-2026. PANTHERS Volleyball Team a keda na di dos lugar.



Comisario di polis Sra. Irma Gordon:

“Hende muher tambe por. Kere den bo mes, nada no ta imposible!”

Parti 1

Cuerpo Policial Aruba den cuadro di nos 40 aniversario ta sigui cu nos seccion historico, informativo y educativo yama “E porta blauw episodio: E bida di un Polis”. Nos ta para keto un rato y conoce Sra. Irma Gordon, comisario di Cuerpo Policial Aruba.

Naci na Oranjestad, Aruba, Sra. Irma Gordon un hobencita simpatica cu un carisma sin igual cu mester a scogico kico ta su soño desde hoben cu a hib’e awe ta un comisario femenino, un hende muher den un funcion di mas importante den un organisacion policial di un Pais. E no a bay facil pero awe e ta conta comunidad su esfuerso, tempo y dedicacion pa yega na e funcion te cu awo.

Aplica na aña 1982

Sra. Gordon su deseo semper tabata ta pa bira polis, maske e tabata tin opcion pa studia pa un dokter, abogado of polis. For di aña 1982 cu e tabata studia na MAO, Sra. Gordon a purba y a aplica pero e resultado tabata envano y no a logra drenta.

Tempo na Hulanda

Na aña 1986 Sra. Gordon a bay Hulanda pa sigui studia y desaroya. For di inicio Sra. Gordon a traha na ministerio di finanzas di Duana pa opleiding di duana e tempo ey. Na Hulanda e la mira cu a habri vacatura na Hulanda pa opleiding di polis pasobra e deseo semper tabata pa bira polis. Tabata na aña 1990 despues di a mira e vacatura y purba atrobe, Sra. Gordon a pasa e pruebanan cu exito y asina e inicio di su carera policial a inicia na Den Haag, Hulanda.

For di october te cu december 1990, Sra. Gordon mester a pasa diferente testnan, manera Hulandes con pa lesa y skirbi y diferente otro testnan.

Despues cu a haci tur esaki Sra. Gordon a logra drenta opleiding di polis oficialmente ariba 1 januari 1991. Na cuminsamento e idioma Hulandes tabata un desafio grandi, pero Sra. Gordon tabatin un meta y un plan pa logra caba e opleiding cu exito pasobra e tabata determina pa haci esaki. Na october 1992 trabao duro a duna su fruto y a termina e opleiding di polis cu diploma den su man.

Despues di a logra su diploma Sra. Gordon a bay traha na wijkteam na Amsterdam, maske e tabata biba na Den Haag e la logra cambia esaki y tabata mas cerca di su famia cu tabata biba na Amsterdam e tempo ey.

Prome experiencia impactante

4 october 1992 e trabao di polis uniforma den Amsterdam a cuminsa. Sra. Gordon a conoce e bario e hendenan y a desafionan. Den e prome dianan a resulta como un prueba di mas grandi den e trabao di Sra. Gordon cu e caida di e avion di carga Boeing 747 di EL AL. E dicho avion a cay den un completo di apartamento den Bijlmer na Amsterdam.

E momento ey Sra. Gordon tabata trahando como polis na civil. E la haya e melding cu tur unidad na Hulanda cu ta Polis of na civil pa acudi cu emergencia na Bijlmer. Bao zwaailicht y sirena Sra. Gordon hunto cu su klas mester a brinda seguridad den e bario di Bijlmer.

Na yegada Sra. Gordon a mira e situacion cu nunca mas e por a lubida. Trahando como civil y algun dia trahando a biba e escenario horroroso y tristo cu e caida di e avion. Maske Sra. Gordon tabata mester a proteha e sitio di e desaster el a biba e emocion di cerca. Un candela grandi di dos piso cu tabata asina cayente cu maske con leu bo ta, bo ta sintie. Sra. Gordon tabata leu y tabata sinti e cayente fuerte dale den su lomba y mester a sigui traha. Sra. Gordon nunca mas ta bay lubida con un candela tabata yora... un yora cu pa semper el a keda corda. Un situacion dificil cu a impacta Sra. Gordon basta fuerte te cu awe.

Desaroyo na Hulanda

Despues di a sigui haci e trabao di polis, Sra. Gordon a sigui desaroya su mes den varios proyecto, curso tambe participacion den comisionnan. Den e wijkteam mes Sra. Gordon a atende school adoptie cu tabata tin inclui varios scol aden. Sra. Gordon a atende mas tanto e zmok-school pa e ta mas cerca di hobennan cu di mester mas atencion.

Tambe e tabata den jeugbegeleiding, kern instructor di x-pol na Hulanda y participacion den volleybal na Hulanda tabata sigur un atencion pa Sra. Gordon mirando cu for di chikito e tabata haci esaki. A pesar di tur esaki Sra. Gordon tabata determina pa yega leu den e carera di Polis.

E yamada pa bay back

Despues di 15 aña, e sentimentonan y gana di bolbe Aruba a yega.

Aplicacion y desaroyo na Cuerpo Policial Aruba: Na aña 1998 Sra. Gordon a bolbe Aruba, a aplica pa un estudio policial na Cuerpo Policial Aruba pa bay NPA na februari di e mesun aña. E tempo ey Sra. Gordon y mr. Molina a haci e pruebanan hunto pa e opleiding aki cu sigur no tabata facil. Sra. Gordon mester a atende un selectiegesprek cu varios persona importante na mesa manera: Altocomisario Nectar, mr. Bernadina, mr.



Van der Straten, Procurador General, y Jeugdofficier. Bao guia di Mr. Martes cu tabata e referencia di Sra. Gordon. Na April di e mesun aña Sra. Gordon a haya un mensahe di mr. Martes cu el a logra pa drenta e opleiding na NPA.

Sra. Gordon a drenta e opleiding ariba 1 augustus 1998 y a dura 3 aña pa motibo cu Sra. Gordon tabata polis caba na Hulanda.

Carera Policial na Aruba: Despues cu a termina cu su estudio na NPA na Hulanda cu exito na aña 2001, Sra. Gordon a bolbe Aruba y a cuminsa traha den luna di augustus di aña 2001. Sra. Gordon a cuminsa como coordinador di ploeg na districto di Oranjestad. Na januari di aña 2002, Sra. Gordon a bay traha na districto di San Nicolas den e mesun funcion.

Pa motibo di su profesionalismo policial e tempo ey Van der Straten a acerca Sra. Gordon pa forma parti di un team di Cero Tolerancia pa motibo di hopi problema den e hotzone di Oranjestad. Cu e curashi y determinacion a lanta e team pa reestablece orden publico back den Oranjestad. Un proyecto cu a resulta exitoso.

Despues e trayectoria policial no a caba y a sigui desaroyo. Sra. Gordon a aplica na aña 2005 pa hefe di Scol di Polis E.J. Watty Vos na unda cu tambe el a logra esaki cu exito te cu aña 2009. Na 2009 Sra. Gordon a aplica como hefe di districto di San Nicolas y a logra esaki cu exito. Na aña 2012 Sra. Gordon no ta para keto y tabata determina pa



mas y a aplica pa comisario di Polis na unda tambe el a logra esaki. Sra. Gordon a bira comisario di Polis di bijzondere diensten di KPA.

Band'i esaki tambe el a forma parti di diferente comisionnan importante manera: Directie Scheepvaart, problema di frontera cu Venezuela. Tambe un tempo a dirigi e polis uniforma como tambe Guarda Nos Costa cu a cay bao di e cartera di Sra. Gordon.

Na ultimo tambe el a haci e funcion di alto comisario interino di KPA. Sra. Gordon ta sintie hopi honra, cu hopi placer y ta orguyoso cu e ta un of e unico hende muher cu a pasa for di abao yega te na e funcion halto como hende muher den un organisacion cu ta mas pa hende homber.

Hende muher den funcion halto

Orguyoso di a haya e oportunidad di a yega asina leu den KPA, pa haci su carera cu maske ta wordo domina pa hende homber pero a logra su meta, tabata palabranan di Sra. Gordon.

Hende muher tambe por

Como hende muher abo mester tin bo norma y bator. E ta conta tambe pa hende homber. Bo mester tin bo soño y bay pe. Logra esaki den tanto tempo! Lo tin hopi obstaculo pero para fuerte den bo sapatonan. Nada no ta imposibel. Mi a cuminsa di abao y wak awo unda mi ta awe. NO laga niun hende bisa abo cu nunca bo no por. Ta depende na abo mes y bo esfuerso cu abo pone den dje.



Beijing ta bisa cu China y Merca mester traha hunto pa promove gobernacion di AI

(AFP) - China y Merca “mester traha hunto pa promove desaroyo y gobernacion di inteligen-
cia artificial (AI)”, vocero di ministerio di Asunto Exterior di China, Guo Jia-
kun, a bisa diamars.

Cooperacion riba inteligen-
cia artificial a ser discuti entre
presidente di Merca Donald
Trump y presidente Chines
Xi Jinping durante discusi-
onnan na Beijing siman pasa,
segun tur dos banda, a pesar
di rivalidad fuerte entre e dos
paisnan tocante e tecnologia
cu ta evolucionando rapida-
mente.

“E dos hefe di estado a tene
discusionnan constructivo
riba asuntonan relaciona cu
AI y a acorda pa lansa un
dialogo intergubernamental
tocante inteligen-
cia artificial,” Guo a bisa durante un
conferencia di prensa, confir-
mando comentario anterior



di secretario di Tesoreria di
Merca Scott Bessent.
Como potencia grandi den e
sector, e paisnan tambe mes-
ter traha hunto “pa sigura cu
AI ta sirbi miho e progreso
di civilizacion humano y bi-
enestar comun di comunidad
internacional”, Guo a añadi.

Analistanan a bisa prome cu e
cumbre cu temornan tocante
arma autonomo cu AI, ciber-
seguridad y menasa di arma
biologico diseña pa AI tabata
preocupacionnan mutuo pa
Xi y Trump.
Na 2024, Xi a acorda cu an-

tesesor di Trump, Joe Biden,
cu hende mester keda den
control di decision pa lansa
armamento nuclear.

Pero mientras China ta de-
termina pa cera distancia cu
bentaha di Merca den e sec-
tor strategico aki, te awor
poco cooperacion adicional a
sigui.
Cas Blanco recientemente a
acusa entidadnan Chines di
esfuerzo “na escala industri-
al” pa horta tecnologia Meri-
cano, mientras cu Beijing a
blokia adkision di un her-
ment di agente AI funda pa

China pa gigante tecnologico
Meta.

Pero na mesun momento,
menasa di ciberseguridad
relaciona cu AI a ser destaca
pa Mythos, un modelo nobo
poderoso cu startup Meri-
cano Anthropic a dicidi no
publica pa evita hackernan
explota esaki.

Bessent a bisa CNBC dia-
huebs cu Washington y Bei-
jing lo establece un “proto-
col” tocante e caminda pa
dilanti riba AI, particular-
mente “pa sigura cu actornan
no-estatal no haya acceso na e
modelonan aki”.

“E dos superpotencianan
mundial di AI lo cuminsa pa-
pia,” Bessent a bisa.
Mientras detaye tocante kico
exactamente lo ser discuti ain-
da ta scars, Sun Chenghao,
investigador senior na Cen-
tro pa Seguridad y Strategia
Internacional di Universi-
dad Tsinghua, a bisa AFP cu

“compara cu 2024, e temanan
pa discuti e biaha aki por ta
mas amplio”.

“E dos banda por comparti
algun practicanan miho y in-
tercambia experiencia tocante
manera pa aborda y mancha”
impacto di AI riba sociedad,
por ehempel tocante empleo
hubenil, el a bisa.

“Aunke China y Merca ta den
competencia den tereno di
AI, impacto di tecnologia di
AI riba henter mundo — y
riba tur tipo di actor, sea es-
tado, sociedad of empresa —
ta extremadamente significa-
tivo.”

Sinembargo, asuntonan deli-
cado separa manera exporta-
cion di chipnan Mericano di
nivel halto cu por entrena y
alimenta sistema di AI pa re-
unionnan separa “por yuda
crea un atmosfera miho pa
discusionnan entre e dos
banda”, Sun a añadi.

Union Europeo ta priminti sosten pa agricultornan afecta pa aumento di prijs di fertilisante debi na guerra cu Iran

(AFP) - Union Europeo lo
libera fondo di emergen-
cia pa yuda agricultornan
enfrenta e aumento fuerte
den costo di fertilisante
causa pa e guerra cu Iran,
segun plannan presenta
diamars pa sostene e sec-
tor.

Bruselas tabata bao presion
pa tuma accion pa limita
impacto di e crisis den Me-
dio Oriente riba agricultura,
mientras aumento den prijs
di fertilisante ta menasa di
subi costo di alimento den
henter e bloc Europeo.

“Nos lo sostene agricultornan
Europeo pa nan por cumpra e
fertilisantenan cu nan mester
pa e proximo temporada di
cosecha,” comisionado di ag-
ricultura di EU, Christophe
Hansen, a bisa.

Pero grupo di lobby agricola
Copa-Cogeca a bisa cu e plan
ta decepcionante y cu e no
ta brinda “ningun respuesta
real”.

Mas o menos un tercera par-
tio di fertilisantenan trans-
porta via lama ta yega mer-
cado global via Estrecho di
Hormuz, cu practicamente a
keda cera pa via di eguera en-
tre Merca-Israel y Iran.
Esaki a causa prijsnan subi, y



e Organizacion Mundial di
Comercio (WTO) a adverti
cu e blokeo ta menasa segu-
ridad alimentario global, par-
ticularmente den Africa y Sur
di Asia.

Como prome medida,
Comision Europeo a bisa cu
lo distribui loka a sobra den
reserva di crisis agricola di
bloc, alrededor di 200 milyon
euro (\$232 milyon).

E tambe lo propone aumen-
ta e reserva cu un “cantidad
substancial” prome cu zomer,
Hansen a bisa, splicando
despues cu Bruselas ta spera
di haci un otro 200 milyon
euro disponible.

“E comision lo brinda apoyo
excepcional dirigi na agricul-
tornan mas afecta,” Hansen a
bisa Parlamento Europeo na
Strasbourg.

Na Europa, prijs di fertil-
isantenan di nitrogeno, cu ta

deriva for di gas, a subi te al-
rededor di 500 euro pa tone-
lada, compara cu 380 euro
invierno pasa.

Esaki tabata un otro golpi pa
agricultornan cu ya tabata
enfrentando costo mas halto
debi na e guerra na Ucrania.
“Si den e proximo siman y
lunanan prijsnan pa catego-
rianan principal di fertilisante
keda na nivelnan actual, e
crisis agricola lo rapidamente
bira inflacion alimentario pa
consumidornan Europeo y
un crisis alimentario riba es-
cala mundial,” Copa-Cogeca
a bisa.

E grupo a organisa pa un
protesta chikito pafor di Par-
lamento Europeo na Stras-
bourg, unda e plan di EU a
ser presenta.

Bruselas a impone tarifa halto
riba fertilisantenan for di Ru-

sia, un productor importante,
y ta plania pa termina im-
portacion completamente pa
2028 den un intento pa golpia
entrada financiero di Moscu
debi na su atake riba Ucrania.
Productornan di cereal, cu
mester di cantidadnan grandi
di fertilisante, a ser particu-
larmente afecta, segun e in-
dustria.

Hansen a bisa cu algun agri-
cultor ta plania pa laga algun
tereno sin uso pa spaar com-
bustible pa tractor y fertil-
isante. “Ta seguridad alimen-
tario cu nos no por laga bay
perdi,” el a bisa.

Fertilisantenan ta representa
mas cu siete porciento di
costo operativo pa e sector
agricola di EU en general,
subiendo te 16 porciento pa
agricultornan di cultivo ar-
able, segun Bruselas.
EU, cu ta dependiente di im-
portacion, tambe ta busca pa
diversifica fuentenan di sum-
inistro y aumenta produccion
local.

Bruselas a bisa cu e kier per-
miti agricultornan usa mas
digestato, un subproducto
rico den nitrogeno for di
biogas, un movimiento cu ta
preocupa gruponan ambien-
tal pa motibo di contamina-
cion di awa.

E tambe a sugeri cu posible-
mente lo duna productornan
di fertilisante mas flexibilidad
bao di sistema Europeo di
mercado di carbono, unda
contaminantenan grandi ta
paga pa gasnan di efecto in-
vernadero cu nan ta emití,
bao di cierto condicion.

Pero el a descarta un pausa
den aplicacion di impuesto
fronteriso di carbono di EU
riba fertilisante — algo cu
Copa-Cogeca a pidi, hunto
cu suspension di tarifa riba
tur fertilisante excepto esnan
for di Rusia y Bielorrusia.
Esnan cu ta sostene e impues-
to ta señala cu e gravamen di
carbono ta apunta riba im-
portacion pa crea igualdad di
competencia pa industrianan
Europeo cu ta bao di regla
stricto di emision, bisando cu
desaroyo di esakinan ta clave
si Europa kier evita un crisis
similar den futuro.

Mas o menos 30 porciento
di e necesidad di fertilisante
di nitrogeno di EU ta ser im-
porta, subiendo te 40 por-
ciento pa potasa.
Pa fertilisantenan fosfatico,
alrededor di 70 porciento di
demanda di bloc ta ser cubri
pa medio di importacion di
piedra di fosfaat, segun ci-
franan di EU.

Chauffeur a baha caminda dal riba palo di luz

Diadomingo madruga a drenta informe di un accidente cu hende herida pariba di Flying Fishbone na Savaneta, mesora a dirigi tanto polis como ambulance na e sitio.

Na yegada di e patruya a bin compronde cu aki ta trata di un accidente unda cu un chauffeur a baha caminda y a bay dal riba un palo di luz. Debi na e impacto e chauffeur a resulta levemente herida. Na yegada di e ambulance nan a atende e victima na e sitio mes y no tabata necesario pa hib'e hospital.



Chauffeur a bira malo tras di stuur y a dal palo di luz cu transformer

Diadomingo merdia a drenta informe di un accidente cu hende herida pazuid di Bright Bakery, mesora a dirigi tanto polis como ambulance na e sitio.

Na yegada di e patruya a bin compronde cu aki ta trata di e chauffeur di un Hyundai Ioniq cu a bira malo tras di stuur, baha caminda y dal riba un palo di luz. Debi na e impacto e palo di luz a kibra y un transformer grandi y pisa cu tabata na halto a cay riba e suela y tabata basha azeta mientras e chauffeur tabata keha di dolor. Way-



anan di coriente tabata colga riba e auto y mester a warda ELMAR kita e coriente por completo. Na yegada di e ambulance nan a atende e victima y a transport'e pa hospital.

Chauffeur a dal semi frontal riba trafico contrario!



Polis y ambulance a bay Rooiweg pa un pelea unda un persona lo a staca su pareha cu un sker



Diasabra anochi a drenta informe di cu un homber lo a staca su pareha cu un sker, mesora a dirigi tanto polis como ambulance na e sitio.

Na yegada di e patruya a bin compronde cu den un pelea un homber lo a dal su pareha un mokete den cara. Polis a detene e homber di biaha na e sitio. Mientras e pareha ta-

bata splica e locual a sucede pues cu den e pelea e homber a dal e un mokete den cara.

Diasabra anochi a drenta informe di un accidente cu hende herida na Turibana, mesora a dirigi tanto polis como ambulance na e sitio.

bata bay zuid.

Na yegada di e patruya a bin compronde cu aki ta trata di un accidente semi-frontal cu basta daño material. Un chauffeur cu a caba di sali f'ey un bar cu un auto Hyundai Accent sin ningun papel regla bayendo zuid a bay na man robes di caminda y dal semi-frontal riba un Toyota Prado, mandando e Prado bay dal un van cu tambe ta-

Debi na e fuerte impacto e chauffeur di e Hyundai a dal su cabes na e windshield. Na yegada di e ambulance nan a atende ambos chauffeur na e sitio mes. Polis a laga e chauffeur di e Hyundai supla y el a surpasa e limite y a keda deteni. Un rato despues e chauffeur di e Prado a sinti su mes malo y a cuminsa keha di dolor. Pa e motibo aki ambulance a bolbe bin pa e chauffeur. E chauffeur di e van si no tabatin mester di atencion medico.

Cobransa di grondbelasting di aña 2026 a sali

E cobranza tin fecha 1 di juni 2026



Departamento di Impuesto a saca e cobransanan di grondbelasting 2026 y den e dianan venidero e contribuyentenan lo ricibi esaki via post. E cobranza tin fecha di 1 di juni 2026. Ta trata di un cobranza cu

ta sali tur aña pa e contribuyentenan cu ta doño di un propiedad inmo-

bil of tin derecho riba un propiedad por ehempel e derecho di erfpacht of vruchtgebruik.

cobransa y persoonsnummer. Di e forma aki Departamento di Impuesto por procesa e pago corectamente.

Grondbelasting 2026 - Fecha 1 di juni 2026

Termino di pago	Fecha final pa haci pago	Suma di pago rekeri segun ley
E prome 2 terminonan di pago	1 di juli 2026	50% di e suma di cobranza pa cubri e prome y di dos kwartaal (jan- maart y april- juni)
Di tres termino di pago	30 di september 2026	25% di e suma di cobranza pa cubri e di tres kwartaal (juli- sept)
Di cuater termino (ultimo termino)	4 di januari 2027	25% di e suma di cobranza pa cubri e ultimo kwartaal (oktober- december)

Pa dia 4 di januari 2027 e cobranza di aña 2026 lo mester ta completamente paga.

Resultado Sorteo
19 mei 2026



Cadena Alexander Lottery ta presenta resultado di weganan di suerte

DIARIO	KORSOU	SUPER4	FLAMINGO
4799	0579	3183	3068
4043	2796	SUPER5	8883
5770	6251	-	8454

MERDIA

Sorteo # 4978
6466
9427
2660
FP
Sorteo # 4978
2868
X2
Sorteo # 3034
7538
Sorteo # 4978
3867
Virgo
Sorteo # 1852
254
FP

ANOCHI

Sorteo # 8850
3505
2500
9643
X5
Sorteo # 7894
0697
FP
Sorteo # 2599
1317
Sorteo # 6653
5024
Capricornio
Sorteo # 1583
364
FP

	Sorteo #	Joker	Letter
0 x Jackpot	Proximo Jackpot		
0 x Match 4+	320.000,-		
0 x Match 4			
0 x Afl. 12,00			
	02-08-13-19-29		
Sorteo # 7184	Proximo Jackpot		
0 x Jackpot	75.000,-		
11 x Match 4			
178 x Afl. 8,00			

	05-07-14-18		
Sorteo # 1871	Mega Ball 08		
0 x Jackpot	Proximo Jackpot		
2 x match 4	260.000,-		
3 x Afl. 500,00			
79 x Afl. 50,00			
70 x Afl. 15,00			
	Afl 360.000,-		

	Sorteo #
Sorteo #	

Pa fiha e suma di impuesto, ta importante pa stipula e balor di e propiedad riba mercado. A base di e balor aki ta haci e calculacion teniendo cuenta cu e tarifa stipula den ley.

Termino di pago

Ley ta duna e opcion pa paga e grondbelasting den un solo biaha of den termino. Mira e skema di e terminonan di pago manera stipula pa ley. Departamento di Impuesto ta conseha e contribuyentenan pa lesa e texto imprimi riba e cobranza cu hopi atencion pa cu e terminonan di pago.

Preferibel haci pago online Por haci pago na un oficina di Departamento di Impuesto, MFA of via banco. Departamento di Impuesto ta recomenda pa haci pago di impuesto online via banco, preferiblemente via Aruba Bank, CMB of Banco di Caribe. E sistemanan di e banco nan aki ta conecta automaticamente cu e sistemanan di Departamento di Impuesto y e mesun dia e transaccion ta keda registra. Ora di haci pago online mester scoge e opcion di Bill Pay y no Transfer. Alabes menciona: grondbelasting 2026, number di

Areglo di pago

E contribuyente cu no por paga su cobranza di acuerdo cu e terminonan legal, awor facilmente por cera un areglo di pago te cu 24 luna den e portal BO impuesto (BOi)

Clientenan cu a registra y haya acceso na e portal di BOi, por cera un areglo di pago den e siguiente forma:

- Ta yena e suma mensual teniendo cuena cu e suma minimo di Afl. 100 pa persona individual y Afl.1.000 pa compania.

- Ta yena e fecha di e prome termino di pago; por scoge pa start cu e prome termino di pago den 60 dia.
- Ta procesa, save y print e areglo di pago.

Ta bon pa tuma nota cu tin condicionnan aplicabel. Clientenan cu ainda no tin acceso na e portal BO impuesto (BOi), por tuma contacto cu Departamento di Impuesto na 522 7423 of 522 7424, pa cera un areglo di pago.

Pa mas informacion tocante e cobranza di grondbelasting por yama na e siguiente number di telefon: 522 7423 of 522 7424.





Cas Di Cultura
Vondellaan 2
Tel: 582-1010

F A D A
Campanastraat 5
Tel: 583-2999
Tel: 583-9610

F A V I
Primavera 233
Tel: 582-5051
Tel: 582-5222

F E P O
Engelandstraat 15
Tel: 583-1016
Tel: 583-6607

**Fundacion Contra
Violencia Relacional**
Tel: 583-5400

**Fundacion Autismo
Aruba**
Irenestraat 21 Aruba
Tel: 588-1179

**Fundacion Pa Nos
Muchanan**
Cumana 2
Tel: 583-4247

**Fundacion Tel Pa
Hubentud**
Wilhelminastraat 19
Tel: 588-6138

**Koningin Wilhelmina
Fonds**
Spinozastraat 9
Tel: 582-0412

Mary Joan Foundation
Sabana Blanco 8
Tel: 588-9999

Rode Kruis Aruba
Pedro Gallegostraat 14
Tel: 582-2219
Fax: 588-3376

Famia Planea (SBVO)
Ave. Milio J Croes 17 B
Tel: 588-9591
www.famiaplanea.org
famiaplanea@hotmail.com

Fundacion Guia Mi
George Madurostraat 34
Tel: 582-0088

Y M C A
Calbasstraat 1
Tel: 582-3072

AL-ANON group
Sabana Liber #8, Noord
(close to the hotels)
Tel: 736-2952 or
593-7081



Dokter na warda

Oranjestad | **San Nicolas**
Hospital | **Imsan**
7:00 pm / 10:00 pm | 24 ora

Botica na warda

Oranjestad: Eagle
Tel. 587 9011
San Nicolas: Centro Medico
Tel. 584 5794

Emergencia

Polis Oranjestad 100
Polis San Nicolas 104
Polis Santa Cruz 105
Polis Noord 107
Tip Line 11141
Brandweer 115
Ambulans 911
Hospital 527-4000
Imsan 524-8833
Warda Costa 913
Seguridad Nacional 11911
Cruz Cora 582-2219

Botica

Aloe 584-4606
4 Centro Medico 584-5794
Central 585-1965
Dakota 588-7364
Del Pueblo 582-1253
Eagle 587-9011
Kibrahacha 583-4908
Maria 585-8145
Di Servicio Noord 586-4606
Oduber 582-1780
Paradera 588-6638
San Lucas 584-5119
Santa Anna 586-8181
Santa Cruz 585-8028
Sero Preto 584-4833
Trupial 583-8560

Utilidad

Setar 117
Web 525-4600
Elmar 523-7147

Funeraria

Aurora 588-6699
Royal Funeral H. 586-4444
Ad Patres 584-2299
Olive Tree 584-8888

TAXI

**Aruba Transfer Tour &
Taxi C. A.**
Tel: 582 2116 / 582 2010

Taxi Adres Services (24h)
Tel. 587 5900

A1 Taxi Services Aruba
Tel: 587-8850
Tel: 280-2828
Whatsapp: 592-7024

FATF: Nacionnan mester coopera pa lucha contra financiamento di teror



(AFP) - Paisnan mester traha hunto pa combati e fluho di placa pa terorismo, e presidente di e vigilante internacional pa financiamento terorista y labamento di placa FATF a conta AFP diamars.

“E terorista no ta respeta frontera. No tin limite. Pues e paisnan no por tin e luho di no traha cu otro. Nos mester coopera,” Elisa de Anda Madrazo a bisa prome cu e reunion tocante combati financiamento di terorismo banda di e reunion di ministernan di Finanzas G7 na Paris.

Financial Action Task Force (FATF), basa na e capital Frances, ta un cuerpo internacional cu ta evalua esfuersonan di mas di 200 pais y hurisdiccion pa preveni labamento di placa y financiamento di terorismo.

E ta compila un “lista shini-shi” di nacionnan cu ta suheto na monitor aumenta di transaccionnan financiero.

De Anda Madrazo su comentarionan ta bini mientras cooperacion internacional y tactica multilateral a ricibi golpi a causa di posicionnan mas fuerte di e podernan grandi, en particular Merca, Rusia y China.

“Nos tin cu intercambia informacion,” el a bisa, citando e Olimpiada di 2024 na Paris como un ehempel.

“Tabatin diferente atake terorista cu a destrui y para pa motibo di inteligencia financiero. Pues nos sa cu e ta traha y nos sa cu e por combati e atakenan. No tin e luho pa stop cooperacion. Nos mes-

ter traha hunto di manera mas fuerte y cerca di otro,” el a bisa.

Na e di 5 “No Money for Terror” su conferencia, cual ta uni varios delegacion, e meta ta di “sigui traha hunto pa nos por keda actualisa cu innovacionnan, adapta metodonan y hermentnan y comparti e miho practicanan,” segun e

presidencia Frances.

Servicionan di inteligencia a observa fragmentacion di atakenan terorista, particularmente jihadista, marca pa e debilitacion di Al-Qaeda y Islamic State Group - pero ta mirando un fortalecimiento di nan y e aumento den menasa domestico for di individuonan.

Pronostico di tempo

Tempo:

Awe tardi y awe nochi: levemente te parcialmente nubla y generalmente seco
Den marduga y mañan: parcialmente nubla cu un awasero pasahero.


Temperatura maximo 33 grado celsius
Temperatura minimo 27 grado celsius
Indice di calor (heat index) den y rond di oranan di merdia: 34 pa 38 grado celsius
UV index: 12

Bahada di solo : 6:58 pm
Subida di solo : 6:14 am

Biento:
Modera te basta fuerte for di direccion oost;
Forsa 4 te 5 (20 te 39 km/ora, 11 te 21 nudo).
Den dia fuerte te duro den rafaga;
Forsa 6 te 7 (40 te 64 km/ora, 22 te 33 nudo)

Situacion general di tempo pa proximo 24 ora:
Extension di e area di presion halto lo domina weer den region durante e periodo di pronostico aki. Humedad transporta cu e fluho di biento lo pone temporalmente mas nubia pasa riba e isla y produci un awasero pasahero. Sinembargo, no ta spera awasero di importancia y weer generalmente seco lo domina.

Un concentracion leve te modera di stof di Sahara ai-



nda ta presente den atmosfera regional y lo stroba visibilidad un poco y trece aire di menos calidad den region local. Personanan sensibel pa cambionan den e calidad di aire mester tene esaki na cuenta.

Condicionnan maritimo/ estado di lama:
Na partinan protegi di costa: Keto cu olanan rond di 1 pia. Na partinan zuid protegi: trankil, 1 te 2 pia. Na partinan zuid no protegi: trankil cu olanan alrededor di 2 pia, localmente 3 pia. Na partinan oost te noordwest di costa: Generalmente modera cu olanan alrededor di 4 pa 6 pia, localmente e lo yega 7 pia.

Aviso/ alerta:
Un aviso pa boto chikito pa partinan oost te noordwest si costa ta sigui na vigor. Usuarionan di lama y landadonan na e partinan expone (no protegi) di costa zuid tambe mester bay cu cautela.

Aurora

Royal Pray

Funeral Home & Crematory

Habri portanan santu pa mi,
mi ke drenta y alabá Señor. Ata e porta di Señor akí,
tur e fielnan ta pasa den dje.
Mi t'alabá bo pasobra B'a skucha mi,
pasobra B'a manda mi salbashon.
Salmo 118: 19-20-21

Nos ta anuncia fayecimento di:



Wilfred B. "Juni" Ridderstap

Mayornan:
†Arcancio Ridderstap
Petronillia "Nia" Growell

Yuinan:
Julisa Y Winston Kayamare
Judenny Ridderstap
Julainy Ridderstap

Nieto nan: Chelona y Jayden Kayamare

Rumannan:
Francis y Candy Ridderstap
Lucrecia "Chichi" Ridderstap y yuinan
Jose Ridderstap

Omo Y Tantan a Bida:
Leoncito "Cito" y Catherine na Canada
Winston Y Juanitay Famia
Leocadia y Famián na Hulanda
Luis "Wiwi" Roosje y Famia
Carlos y Rugia na Bonaire
Patricia y famia na Hulanda
Dorothea y famia na Hulanda
Roberto y famia na Hulanda
Narciscio y Famia
Rafael Violeta y Famia
Elvira y Famia
Jacinto y Famia
Molly Y famia na Curacao

Sobrino y Sobrinnan na Aruba y na Hulanda
Primo y primanan: Aruba, Hulanda, Canada y Saudi Arabia

Mama di su Yuinan:
Christina De La Cruz Valde, famia Na Aruba ,Hulanday
República Dominicana.

Padrino: † Nel Wever
Madrina: † Julieta Tromp

Amigo Di Cas: Ramon Wernet y Chayenne Werleman

Amigo y Coleganan di: Respaldo FSMA, Stichting Elizier y
Zorg Met Liefde Tehuis.

Un Danki Especial na Koningin Welhelmina Kanker Fonds y
Life Lite Medicab NV

Famia: Ridderstap, Growell, Maduro, Lopez, Calatayut, De
La Cruz, Valdez, Kayamare, Howell, Janga, Jimenez, Vil-
lanueva, Flanders, Gamarra, Ras, Goeloe, Kelly, Hofftijzer,
Caldas Flores, Lopes, Tromp, Rodriguez, Molina, Simon,
Moshen, Kock, Frank, Franken, V/D Briezen, Boekhoudt,
Violenus, Casuela, Giel, Hopps, Wever, Angela, Wout-
ers, Rasmijn, Vrolijk, van Heyningen, Hyleger, Werleman,
Geerman.

Enbes di flor of krans lo tin un box disponibel pa Koningin
Welhelmina Kanker Fonds.

Ta invita pa acto entiero cual lo tuma lugar Diabierna 22 di
mei 2026 di 2or pa 4or di atardi na Pray Funeral Home y
despues lo sali bai pa santana central na Sabana Basora.

Aurora

Royal Pray

Funeral Home & Crematory

Señor ta mi wardador, mi'n tin falta di nada.
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa.
Salmo: 23

Nos ta anuncia fayecimento di nos ser querí:



Roy Egbert de Cuba
*28 december 1947 - †11 mei
2026

Na number di:
Mayornan:
† Isaac (Bubuchi) de Cuba
† Maria Auxiliadora (Dora) de Cuba - Irausquin

Casa:
Filomena de Cuba-Diaz

Yuinan:
Dorothy Obiama Madu- de Cuba
Astrid Wallé-de Cuba y Edward Wallé
† Ricky de Cuba
Roberto de Cuba y Carolina de Cuba-Arrieta

Nietonan:
Thari Kock
Christa Kock
Rick Koridon-ten Hagen y Bart ten Hagen-Koridon
Ethan Wallé y Madelief Oostenbrink
Alanis Wallé y Guyliano Thiel
Rogin de Cuba
Noah de Cuba
Ian de Cuba
Tata di su nietonan:
Randy Kock
Lyon Koridon

Rumannan:
† Grace van Balkom - de Cuba y † Hans van Balkom
† Ronnie de Cuba y † Rina de Cuba-Mansur
† Mimi de Cuba
Eric de Cuba y Maria de Cuba - Arends
† Norman de Cuba y Joyce de Cuba- Hollander
Nel de Cuba y Enid de Cuba - van der Weide
† Anthony de Cuba y † Zoraida de Cuba- Oduber
Isaac de Cuba y Claire de Cuba - Oduber

Tur subrina- y subrina, primo y prima, ihanan, swa y cuña y demas
famia y amistad na Hulanda, Colombia y Venezuela.

Un danki na S.A.B.A. St. Michael's Paviljoen pa e cuido.

Nos disculpa si den nos tristeza por a lubida algún miembro di famia
of conocirnan.

Nos ta invita tur famia, amistadnan, conocirnan pa asisti na e acto
di entiero y condolencia cual ta tuma lugar diabierna 22 di mei 2026
for di 12:00 di merdia pa 2or di atardi na Misa Pro Catedral San
Francisco de Asis y despues lo sali bai pa santana catolico na Playa.

- Zij die wij verliezen
zijn nooit meer waar ze waren, maar altijd waar wij zijn -

Nos ta lamenta cu despues di entiero nos no ta risibi bishita di
condolencia na cas.

Aurora

Royal Pray

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Nos ta anuncia fayecimento di:



Andres Rudolf Kock
Mihor conoci como "Mo-Deshi" -
"Deshi"
* 14 Jan '45
† 13 Mei '26

Na number di su:
Yuinan:
Alaisa Kock
Giovanni Kock
Juan Carlos Espinal y yuinan
Gregory Kock y pareha Emmely Brete y yuinan

Rumannan:
† Maria y † Juan Peña y yuinan
† Pedro y Laurina Gomez y yuinan
† Nemencio Sixto Gomez
† Antonio y Teresa Gomez y yuinan
† Casildo Gomez
† Dolores y Olindo Thiel y yuinan
Marcela y † Chone Wiersma y yuinan
† Raymundo y Eve Kock y yiu
† Angel Kock
Aliria y Wilhelmus Cicilia y yuinan
Otilio y Yolanda Kock y yuinan

Na tur su sobrino y sobrinanan cu e a stima masha hopi.

Su primo y primanan: Albert, Carolina, Damian, Willems, Koolman,
Ramos, Thiel, Winterdaal

Famianan serca di cas: Henriquez, Tromp, Stamper, Famia Pardo,
Dania,

Bon bisñanan: Edwin Bautista, Victoria Andrews, Robert St Jago,
Beatrix Angela, Grace Godet, Julio Alberto Mora, Sandra Gonzalez
Jimenez,

Su ayudante cu hopi pasenshi: Milagros Medina Daal y su Barber
Alvin "John" Lopez.

Su ex-coleganan di CMB NV y Wema

Nos disculpa si den nos tristeza por a lubida algún miembro di famia
of conocirnan.

Condolencia lo tuma lugar diamars 19 di mei 2026 na Aurora
Funeral Home, di 7or pa 9or di anochi. Acto di intiero lo tuma lugar
diarason 20 di mei 2026 di 2or pa 4or di atardi na Aurora Funeral
Home y despues lo sali pa Santana na Sabana Basora.

Despues di intiero nos no ta risibi bishita di condolencia na cas.

Aurora

Royal Pray

Funeral Home & Crematory

Lagrima y flornan por seca, su recuerdonan y tur
loke el a haci y significa pa nos, lo keda graba pa
semper den nos mente y curason.
"Cerca Dios mi alma ta na paz, ta di DJ'E mi
salbacion ta bin"
Salmo 62:1

Na number di sobrina(o)nan nos kier participa
fayecimento di nos tanta stima:



Aquilina Christina
Eckmeyer
*24-07-1942 - †18-
05-2026

Acto di entiero lo
wordo anuncia
despues.

Aurora

Royal Pray

Funeral Home & Crematory

You danced through life with endless hope, a groovy soul and a spirit that lifted everyone around you. Even in the hardest moments, your light never faded and your laughter never stopped playing. Though the music pauses today, your beautiful energy will live on forever in our hearts.

A bai drumi dushi den brasa di senor, nos querido ruman, omo, subrino, primo y amigo:



Dennis Ovid Martino Laclé
*10-02-1955 - †12-05-2026

Na number di su:
Mama:
†Natividad Sira Laclé-Oduber

Tata:
†Juan Ovid Laclé

Rumanan:
†Frieda y Glyn Morgan
†Ronny y †Marie Pierre Laclé-Fénart
†Dolfi y Vivecca Laclé-Chirino
Johnny y Dilaila Laclé-Harms
Rafael y Vera Laclé-Gomez
†Filomena Laclé
†Ethlyne Laclé
†Glenn y †Trina Laclé-Maduro
Mary Laclé
Steve y Odalis Laclé-Lopez

Subrino y subrina nan manera yui:

Mark, Marice, Esmee, Paco, †Dave, Levi, Alvin, Ewald, Oswald, Joanaila, Ralph, Melissa, Zulaika, Milouska, Franchesca, Marilyn, Annuard, Thierry, Odille, Odina.

Yuinan di su subrino y subrina nan cu e a stima.

Primo y prima nan, ihanan y demas famia y admistad nan.

Amigonan:
Sedi Jansen, Andres Solognier, Lindo Croes, John Paula, Thomas Chung, Dolf Maduro, Tonya Koolman, Chu Rincones, Orman Marchena y demas amigo nan. Amigonan di Team di Aruba Muscle Classic Car Club

Ex-colega nan di entre otro Casino di Concorde, Casablanca Casino, y Renaissance Casino.

Un danki di curason na Personal di Cas Marizul, S.A.B.A y Wondenpolie.
Nos ta invita famia, amigo, bisinja y conocirnan pa e Celebration of Life di nos Dennis stima cu lo tuma lugar diahuebs 21 di mei 2026 na Misa Santa Filomena na Paradera di 2or pa 4or pm.
Despues lo sigui pa santana di Paradera pa hiba nos Dennis na su ultimo lugar di sosiego.
Preferibelmente si por bin bisti den colornan alegre.
Lamentablemente despues di entierro, nos no ta ricibi bishita di condolencia na cas.
Nos kier a pidi nos disculpa si den nos tristesa nos por a lubida di menciona un of otro famia y amistad.

Aurora

Royal Pray

Funeral Home & Crematory

El Señor es mi pastor, nada me falta.
Aunque camine por valles oscuros, no temeré, porque Tú, Señor, estás conmigo. Tu bondad y tu amor me acompañarán todos los días de mi vida, y en tu casa, Señor, viviré por siempre.”
Salmo 23

Hoy Dios abre sus brazos para recibir un alma noble y llena de luz. Aunque nuestro corazón siente tu ausencia, encontramos consuelo en saber que ahora descansas en la paz eterna del Señor. Gracias por el amor, las enseñanzas y los momentos compartidos; tu recuerdo vivirá siempre en nuestras oraciones y en lo más profundo de nuestra alma.
Vuela Alto hacia el regazo de nuestro padre celestial!

Nos ta anuncia Fayecimiento di:



Diana Elizabeth Gonzalez Colina
*29 Okt 2002 - †13 Mei 2026

Na number di su:
Tata:
Jose Vicente Gonzalez

Mama:
Maria del Carmen Quintero

Primo hermanos:
Michael Marin Gonzalez y Michelle Marin Gonzalez

Abuelos:
†Roque Rafael Gonzalez y Bertha Luisa Colina de Gonzalez
Luis Delio Quintero y Maria Mercedes Cardona Marulanda

Omonan:
Edison Quintero,
Lucas Gonzalez y famia,
Jose Heath Aizpurua y famia
Tantan: Monica Gonzalez,
Reina Gonzalez y famia,
Maria Dolores Quintero,
Maria Liliana Quintero Cardona,
Gaudys Joya.

Primo y primanan: Leidy Viviana Martinez, Maria Alejandra Sanchez Quintero, Paola Andrea Sanchez Quintero, Luisa Maria Sanchez Quintero, Harrison Gonzalez.

Amigo y amiganan: Isabella Polanco, Angie Isabella, Gaby Aguas, Kioma y Axel Maduro y demas amigonan.

Demas Famia y amigo nan di cas: Polanco, Sanchez, Aguas, Moreno, Gedler, Sanchez, Acosta, Jimenez, Gonzalez, Maduro, Croes, Cedeño, Fonseca, Eckmeyer, Adoptie, Leyba, Gutierrez.

Su coleganan di Manchebo beach Resort.

Acto di despedida lo ta diahuebs 21 mei 2026 di 6pm pa 9pm na Aurora Funeral Home. Acto di cremación lo tuma lugar den seno familiar.

Nos disculpa si den nos tristeza nos por a lubida un of mas famia.

Despues di despedida nos NO ta ricibi bishita di condolencia na cas.

Aurora

Royal Pray

Funeral Home & Crematory

“Señor ta mi wardador, mi’n tin falta di nada.
Den cunucu di yerba berde e ta ponemi sosega.
E ta hibami na awa trankil,
pa mi bolbe haña forsa”.

Salmo: 23

Esposa, yiuinan, nietonan y rumanan ta anuncia fayecimento di:



Sr. Hynish A. de Jongh
Mihor conoci como
“Arthur”
*04-05-1948 - †12-05-2026

Mayornan:
†Angelica Williams
†Edward de Jongh
Na number di su:
Casa: Edseline de Jongh-Evertsz
Yiuinan:
Leonardo de Jongh y famia
Genevieve de Jongh
Journard de Jongh
Rumannan:
Lloyd de Jongh
Diana de Jongh
†Helen de Jongh
Coleta de Jongh-de Pool y Egito de Pool y famia
Roxanne de Jongh y Jasper
Subrinanan:
Chantal de Jongh
Christel Perdue y famia
Oliver de Jongh y famia
Irvin de Jongh
Dulcinela de Jongh y famia
Marilou de Jongh y famia
Primanan:
Taffy de Jongh y famia
Giana de Jongh
Nietonan:
Leegiomar de Jongh
Leeshon de Jongh
Leeshiana de Jongh
Cuñanan y sua:
Vivian Ortege y famia
Wendell Evertsz y famia
Ruthmila y famia
Rosetti van der Wal y famia
Tur amigo(a)nan di corsow y Aruba.
Tur su ex coleganan aki na Aruba.
Demas famia: de Jongh, Buckley, de Pool, James, Nilsen, Roosburg, Ortega, Gurley.
Ta invita pa acto di entierro cual lo tuma lugar na Aurora Funeral Home diahuebs 21 di mei 2026 di 2or pa 4or di atardi. Despues lo sali pa Santana Central Sabana Basora.
Nos disculpa si den nos tristesa nos por a lubida algun famia of conocir

Aurora

Royal Pray

Funeral Home & Crematory

Nos ta anuncia fayecimento di:



Jozef Errol Statius
Mihor conoci como: Roy of Bashaka
27 August 1952 – *6 May 2026

Acto di entierro lo wordo anuncia despues.

Aurora

Royal Pray

Funeral Home & Crematory

Wie schuilt bij de Allerhoogste, en overnacht in de schaduw van de Almachtige, zegt tegen de Heer: 'Mijn toevlucht en mijn vesting, mijn God, op wie ik vertrouw.
Psaln 91: 1-2
†

Met grote verslagenheid, maar dankbaar voor alle liefde en mooie herinneringen die hij ons heeft gegeven, delen wij u mede dat is heengegaan onze dierbare zoon, broer, oom en zwager.



Kenneth G. Lynch
beter bekend als “Kaya”

★13 September 1966 –†02 Mei 2026
In leven weduwnaar van Geraldine Lampe.

Ouders:
Edmund †en Suzanne Lynch-Grandisson

Zussen & Broers:
• Maudy Vorm- Lynch
• Gladys Lynch
• Patricia Ramkisoen-Lynch & Sonny
• Johnny † & Helen Lynch- Brondenstein
• Lydia Mangoensentono- Lynch † & Maridi
• Hedy Lynch & Glenn Grant †
• Ivette Lynch & Jerry
• Steve Lynch

Nichten & Neven:

- Sharol, Ishmael & Malachi
- Jo-Ann & De-André
- Durwin
- Soraya & Dylan
- Dino & Carina, Lia
- Sergio
- Sharon, Shermenne en D'-Sherro
- Jonathan & Sherry
- Gary
- Wayne
- Miguel & Ashley, Christiano, Jemuel
- Mannely

Vrienden & Overige Buurtbewoners van Pos Chiquito Complex 4:
Ivonne Vrolijk, Estela O., Arthur P., Gerlin & Patrick, Carlos G., Celestina Y., Anthonio V., Shyla S., Tatiana A. en Miguelina T.

Afscheid & Crematie
Datum: Woensdag 20 mei 2026
Tijd: 19.00 - 21.00
Plaats: Pray Funeral Home (San Nicolaas)

“To live in hearts we leave behind is not to die”
~ Thomas Campbell ~

Aurora

Royal Pray

Funeral Home & Crematory

Mi bida tabata un pintura pinta p'un cuashi di inocencia, colorido y cu yen sonrisa.

Cu dolor na nos curason, nos ta participa fayecimento di:

Ludwina Maria Becker
Mihor conoci como
“Wina of Chiwin”
★11-05-1957 - †19-05-2026

Acto di despedida lo wordo anuncia despues.



Aurora

Royal Pray

Funeral Home & Crematory

“ Mi no a muri.
Ta p'esey mi no a bisa ayo.
Mi a djis habri mi halanan y bula bai keiro.
Boso a keda atras.

No laga tristeza domina boso.
Keda uni un cu otro pa mi alma, esey lo ta un alegria.
Recordami cu hopi amor.”

Cu dolor na nos curason pero conforme cu boluntad di Dios, nos ta anuncia fayecimento di nos ser kerí:



Lilian Maria Saladin
Cariñosamente yama:
“ Mary of Tia Mary”

★07-08-1949 - †09-03-2026

Na number di su:

Esposa:
Margaretha (Margriet) Beekman y yiuunan

Tata:
† Fransisco “Don Pancho” Saladin

Mama:
† Lilian Sanchez de Saladin

Rumannan:
Francis Saladin
† Luis Alfredo (Freddy) Saladin y † Emma Croes
Jose y Maritza Saladin
Leonardo de Jesus (Adi) y Zafira Saladin

Manera yiu:
Ranzinho Saladin

Tantanen:
Luisa Thörn y famia na Zweden
Cesarina S Frenero y famia

Subrinonan y Subrinanan stima:
Deborah d' Abreu de Paulo - Saladin, esposo y Famia
Francis Jr. Saladin, pareha y Famia
Joselito Saladin, esposa y Famia
Aimée Tromp Saladin, esposo y Famia
Andre Saladin, pareha y yiu
Gladys Croes Saladin, esposo y Famia
Ranzinho Saladin, esposa y Famia
Alberto Saladin y yiuunan
Liliana Porringa Saladin, esposo y Famia
Leonardo Jr Saladin, pareha y yiu
Jairo Saladin y yiu
Christiaan Saladin, pareha y Famia
Jeanthiel Saladin, pareha y Famia
Franchesca Saladin

Amigo(a)nan stima:
† Joy - Emy - Charito - Nayanna - Gerry - Elmita - Fejite - Rebecca - Carla - Nora

Prima y Primonan na Aruba y den Exterior.

Famianan:
Saladin, Sanchez, Beekman, Frenero, Rodriguez, Fingal, Lampe, Lejuez, Croes, Tromp, Kock, Webb, Soiland, van Tilborg, Henriquez, Porringa, Bennet, Oduber, Trimon, Thörn, Thiel, Paz, Arendsz

Nos disculpa si den nos tristeza nos a lubida un famia of conócir.

Ta invita pa despedida cual lo tuma lugar na Aurora Funeral Home diabierna 22 di mei 2026 di 9'or pa 11'or di mainta. Despues lo hiba su shinishi na Santana Catolico na Playa.

Aurora

Royal Pray

Funeral Home & Crematory

Senjor ta mi wardador, mi'n tin falta di nada”
Den Cunucu di yerba berde e ta ponemi sosega” hunto mas.
E ta hibami na awa trankil, pami bolbe haña forsa”.
Salmo 23

Cu dolor na nos curason, pero conforme cu boluntad di Dios, nos ta anuncia fayecimento di:



Teodoro Tromp (Dodo)
★ 04 di April
1936 - † 10 di Mei 2026
Ex empleado di Lago

Na number di su Esposa:
Ema Antonia Tromp Raas

Su Yuinan:
Jalitzta y Laudelino Zambrano Tromp
Jasmira y Hiran Colina Tromp
Jarelis y Mehmet Coşkun Tromp

Nietonan:
Lytzander y Magda Zambrano Peña
Joshua Colina Tromp
Joanne y Julio Oviedo Colina
Raşit Coşkun
Jodrick Colina Tromp
Lytzanis Zambrano y Mark Schwaiger
Rahim Coşkun
Raşide Coşkun
Joendel Colina Tromp

Bisnietonan:
Lynneth, Lyss, Neslihan, Chloec, Aliyyah, Aydin

Rumannan:
† Martin Tromp
† Alejandrina y † Michel Victoria Tromp
Mathilda y † Feliciano Thielman Tromp
† Ludovico (Tani) y † Maritza Tromp Sprok
Feliciano (Djie) y † Ria Tromp Van Dalen
† Mauricio (Nichu) y Carmen Tromp Kelly
Supriana (Ana) y Lucas Semeleer Tromp
Lucia y Nelson Sprok Tromp
Felepina (Pina) Tromp

Sobrino y Sobrinanan:
Jenny, Maria, Roland, Patrick, Jairo, Emily, Sharon, Maurits, Anouska, Artania, † Carol, Vincent, Natalie, Canisio, Jose, Khys, Luskys, Nancy, Cynthia, Eduardo Jr. Idania, Nilvis, Rikhaira, Nolitá, Miguel, Gwendeline, Laurene, Esther, † Viosotis

Demas Famia:
Tromp, Colina, Zambrano, Coşkun, Peña, Zuñiga, Figaroa, Kelly, Jansen, Scharbaay, v/d Plank, Koolman, Thielman, Van Dallen, Semeleer, Sprok, Maya, Raas, Arendsz, Mendez, Limonier, Aponte, Snijders, Rustveld, Garcés, Raaz, Ruiz, Gei, Franken, Mavo, Corona, Kock, Wernet, Soto, Salazar, Chan, Schwaiger, Geerman y Dania

Su primo y primanan, comer, compernan, ihanan, amigonan en especial amigo cercano di famia Aaron y ex coleganan di Lago

Famianan na Corsow, Hulanda, Venezuela, Sint Barths, USA, Turkia, Costa Rica, Spaña, Belgica y Ecuador

Nos Disculpa si den nos tristeza nos por a lubida algun miembro di famia

Un agradecimento special na Dr. Lacle y Dr. Fingal, zusternan y broedernan di Horacio Oduber y specialmente na Broeder Lopez.

Nos ta Invita tur amigo, bisiaña, conócirnan y demas famia pa asisti na acto di Condolencia y Entiero cu lo tuma lugar na Aurora Funeral Home diaranson 20 di mei 2026 di 9or pa 11or di mainta. Despues lo sali pa Santana Catolico na Savaneta

Nos ta lamenta cu despues di entiero nos no ta ricibi bishita di condolencia na cas.

Atakenan conhunto di Nigeria y Merca ta mata 175 combatidor di Estado Islamico

(AFP)—Nigeria y Merca a bisa diamars cu atakenan aereo conhunto a mata 175 combatidor di Estado Islamico den noordoost di e pais, incluyendo e segundo comandante global di e grupo jihadista.

E region remoto ta experienciando un insurgencia extremista Islamico desde 2009, prome pa Boko Haram, y despues pa su separacion y rival, Estado Islamico Provincia di West Africa (ISWAP).

Segun Nacionnan Uni, mas cu 40.000 persona a muri y dos miyon otro a ser desplasa.

Forsanan Mericano y Nigeriano a mata Abu-Bilal al-Minuki, un lider di Estado Islamico describi como e “terrorista mas activo” na mundo, den un pueblo remoto den noordoost durante fin di siman pasa.

Ehército di Nigeria a bisa diamars cu 175 militante di Estado Islamico te awor a ser “elimina for di campo di batalla.”

“E atakenan conhunto a resulta den destruccion di checkpointnan di ISIS, depositonan di arma, centro logistico, equipo militar y rednan financiero usa pa sostene operacionnan terrorista,” el a agrega.

Como director di operacionnan global di Estado Is-



lamico, e difunto al-Minuki tabata duna guia strategico riba operacionnan mediatico y financiero y “desaroyo y fabricacion di armamento, explosivonan y dronenan,” segun ehército Nigeriano y Comando Africa di Merca (AFRICOM).

Un vocero di AFRICOM a confirma e cifra di 175 entre e jihadistanan.

Comandante di AFRICOM general Dagvin Anderson a bisa durante un audiencia den Congreso na Washington cu Nigeria tabata “instrumental durante e ultimo varios lunanan, desaroyando e obhetivo, yudando nos cu inteligencia y ofreciendo

apoyo.”

Despues di e anuncio di morto di al-Minuki, presidente Nigeriano Bola Ahmed Tinubu a gradici su ekivalente Mericano Donald Trump pa su “liderazgo y apoyo firme.”

El a bisa cu e ta sperando “mas atakenan decisivo contra tur enclave terrorista den henter e nacion.”

Figuranan importante

Segun declaracion militar di diamars, e operacionnan den e ultimo dianan tambe a mata otro figuranan importante di Estado Islamico.

Entre nan ta Abd-al Wahhab,

describi como un “lider superior” di ISWAP, “responsable pa coordina atakenan y distribui propaganda.”

Abu Musa al-Mangawi tabata supuestamente un miembro di rango halto di ISWAP mientras Abu al-Muthanna al-Muhajir tabata un “gerente superior di equipo di produccion mediatico y confidente cercano di al-Minuki.”

“Varios lider clave di ISIS” a muri, segun Anderson.

Boko Haram y ISWAP recientemente a intensifica atakenan reporta contra pueblonan, wardanan di polis y trahadornan manera piscadornan, hunto cu basenan

militar, causando morto di varios civil y oficialnan militar di rango halto.

E aumento den atakenan a pone Tinubu declara un estado di emergencia nacional na 2025 y presidente Mericano a menasa Nigeria cu intervencion militar.

Trump a afirma cu Cristianan na Nigeria tabata siendo “persigui” y ta victima di un “genocidio” cometi pa “terroristanan.”

Gobierno na Abuja y mayoria experto ta rechasa e afirmacion ey, y ta señala cu e violencia generalmente ta afecta Cristian y Musulmannan sin distincion.

E ehército Mericano, den coordinacion cu autoridadnan Nigeriano, a haci atakenan aereo riba 25 di december aña pasa den estado noordwest di Sokoto, enfocando riba loke Washington a yama jihadistanan.

Norte di Nigeria ta luchando cu violencia di gangnan criminal cu frecuentemente ta haci atakenan riba pueblonan y secuestronan masivo pa rescate.


AFRICOM tambe a tuma accion contra militantenan di Estado Islamico y al-Shabaab na Somalia, intensificando atakenan aereo desde comienso di aña.

Merca atrobe ta evita tuma responsabilidad pa atake riba scol na Iran

(AFP)—Un comandante halto di forsan Mericano den Medio Oriente a evita diamars di tuma responsabilidad pa un atake riba un scol na Iran cu a laga 155 persona morto riba e prome dia di e guerra, insistiendo cu un investigacion “compleho” ainda ta andando.

Almirante Brad Cooper, comandante di Comando Central di Merca (CENTCOM), a bisa un panel di supervision den Congreso cu “e scol mes ta localisa riba un base activo di misil crucero di IRGC,” haciendo e investigacion “mas compleho cu un atake promedio.” IRGC ta representa Guardia Revolucionario Islamico di Iran.

E atake a mata 73 mucha



homer, 47 mucha muher, 26 maestro, siete mayor, un chauffeur di bus di scol y otro adulto den ciudad sur di Minab dia 28 di februari, segun medio estatal Irani. Merca repetidamente a evita di asumi responsabilidad pa e tragedia.

Cooper tabata contestando preguntanan di miembro

principal di Komite di Servicionan Arma di Camara, Adam Smith, un Demócrata, kende a bisa cu “den pasado, ora nos tabata haci e tipo di erornan aki, nan tabata ser reconoci rapidamente, aunke un investigacion adicional tabata necesario.”

Cooper a priminti pa comparti e resultadonan di e in-

vestigacion ora e termina. Smith a responde bisando: “Pues esey ta un ‘no.’ Nos no lo tuma responsabilidad pa algo cu claramente nos a haci.”

The New York Times a reporta anteriormente cu e scol a ser afecta pa un misil crucero Tomahawk di Merca, un arma cu Iran no tin posesion di dje. CNN tambe a reporta cu Merca tabata responsable pa e atake.

Presidente Mericano Donald Trump a afirma inicialmente cu posiblemente Iran mes tabata tras di e atake pasobra “nan no tin ningun exactitud” cu nan municionnan.

Democratnan den e Camara a presenta procedemento di impeachment contra secre-

tario di Defensa Pete Hegseth despues di e atake, aunke esaki tabata considera simbolico pa motibo di control Republicano di e Camara.

Iran a afirma prome cu mas cu 175 maestro y estudiante a muri, prome cu revisa despues e cifra di mortonan.

AFP no a logra acceso na e localidad pa verifica independientemente detayenan reporta pa medio Irani.

Israel consistentemente a nega cualkier involucracion den e atake.

Oficialnan Mericano, incluyendo lidernan militar, a bisa repetidamente cu nan no ta apunta riba civilnan.

Conseho di Seguridad di UN ta condena atake riba planta nuclear di UAE

(AFP)—Rusia a reuni cu otro miembronan di Conseho di Seguridad di UN diamars pa condena e atake cu drone riba planta nuclear Barakah di UAE, cual Abu Dhabi a bisa a origina for di Irak unda proxynan pro-Iran ta activo.

E drone no reclama a dal un generator electrico diadomingo cerca di e prome planta nuclear di mundo Arabe na Barakah den emirato di Abu Dhabi, causando un candela pero sin causa heridanan ni leak di radiacion.

“Atakenan enfocando riba facilidadnan nuclear pacifico den cualquier pais na mundo... ta categoricamente inacceptable,” embahador di Rusia na UN Vassily Nebenzya a bisa.

“Den e contexto aki, nos pais ta condena categoricamente e accionnan di esnan cu a haci e atake enfocando riba e planta den territorio di UAE, crean-



do di e manera aki riesgonan di escalacion,” el a continua sin nombra ningun partido.

“Nos ta confia cu tur stakeholdernan lo haci loke ta necesario pa evita repeticion di un

incidente asina peligroso,” el a agrega, notando cu probablemente e atake lo no a sucede sin e operacion Mericano-Israeli contra Iran, aliado di largo plazo di Moscu.

Abu Dhabi a bisa diamars cu e dronenan a bin for di Irak, unda gruponan sosteni pa Iran ta haciendo atakenan contra nacionnan di Golfo desde cu e guerra den Medio Oriente a plama.

For di China te Merca, otro miembronan di Conseho di Seguridad tambe a condena e atakenan, cu ainda no a ser reclama pa ningun grupo.

“Cual nacion sano, sea directamente of indirectamente via proxynan, ta manda atakenan cu drone na un planta nuclear activo y operacional?” embahador Mericano Mike Waltz a puntra, condenando e “atakenan indignante y inacceptable.”

“Kico mundo lo kere? Cu si Iran... no por logra un arma nuclear — y no por usa esey manera el a menasa repetidamente contra su bisiñanan — cu awor e lo busca un manera inteligente y peligroso pa converti un planta nuclear den arma?”

“Mi ta hay’e dificil pa yega na cualquier otro conclusion,” el a bisa.

Procurador General interino di Merca ta defende fondo pa aliadonan di Trump cu a ser persigui

(AFP)—Procurador General interino di Merca Todd Blanche a defende diamars e creacion di un fondo di casi \$1,8 bion pa compensa aliadonan politico di presidente Donald Trump cu segun e partido a ser procesa in-hustamente bao di administracion di ex-presidente Joe Biden.

Blanche, testificando dilanti di un comision di Senado, a ser repetidamente ataca pa Democratanan cu a critica e skema como un “slush fund” corrupto pa recompensa lealistanan di e presidente Republicano cu placa di contribuyente.

“Laga nos ta cla, di cual nos ta papiando aki no ta nada menos cu e presidente actual di Merca probechando e tesoro pa su propio beneficio,” senador Patty Murray di estado Washington a bisa. “Esaki ta corrupcion cu nunca no tabata mas evidente.”

Departamento di Husticia a anuncia creacion di e asina yama “Anti-Weaponization Fund” dialuna como parti di un acuerdo den cual Trump a kita un demanda contra Internal Revenue Service (IRS) pa un filtracion di su declara-



cion di belasting di algun año atras.

Un apendice na e acuerdo libera pa Blanche diamars ta prohibi IRS di persigui Trump, su famia of companianan pa reclamonan di belasting den pasado.

Blanche a bisa cu Trump mes no lo ta eligible pa compensacion for di e fondo y el a rechasa acusacionnan cu e placa “lo bay solamente na Republicanonan of amigonan di e presidente.”

“Sea bo ta Hunter Biden of cualquier otro individuo cu a kere cu nan tabata victima di armamento, tur por aplica pa e fondo aki,” el a bisa, den referencia na e yiu homber di ex-presidente Joe Biden,

kende a ser condena pa crimennan di arma y belasting mientras su tata tabata den Cas Blanco.

Blanche no a exclui e posibilidad cu simpatisantenan di Trump cu a ser condena pa ataca polis durante e asalto di 6 di januari 2021 na e Capitol lo por ta eligible pa pago.

“Cualquier hende den e pais aki ta eligible pa aplica si nan ta kere cu nan tabata victima di armamento,” Blanche a bisa. E, kende ta ex-abogado personal di Trump, lo nombra e cinco comisionado cu lo supervisa e fondo.

Trump a emití un pordon masivo pa acusadonan di 6 di januari riba su prome dia den cargo aña pasa.

Blanche a bisa cu e fondo tabata necesario pa “compensa pa loke Democratanan y Biden y (ex-Procurador General di Biden Merrick) Garland a haci durante cuatro aña.”

Despues di sali for di Cas Blanco na 2021, Trump a ser investiga y acusa pa fiscal special Jack Smith pa su intentonan pa anula su derota electoral di 2020 contra Biden — cual a conduci na e insurgencia di 6 di januari — y pa supuestamente maneha documentonan clasifica incorrectamente.

Blanche a sirbi como abogado di Trump y ambos caso a ser retira despues cu e Republicano a gana eleccion presidencial di 2024.

E historia personal entre Blanche y Trump a bin dilanti repetidamente durante e audiencia di Comision di Apropriacion di Senado, unda senador Jack Reed na dado momento a compar’e cu un consehero di mafia.

“Bo ta e ‘consigliere’ di e presidente,” e Democrata di Rhode Island a bisa.

Senador Chris Van Hollen, un Democrata di Maryland, a

acusar Blanche di “actua awe manera abogado personal di e presidente.”

“Y esey ta henter e problema,” Van Hollen a agrega.

Trump, su dos yiunan homber mayor Eric y Donald Jr., y e Trump Organization a presenta un demanda contra IRS na januari buscando \$10 bion den daño pa motibo di e filtracion di declaracionnan di belasting.

Un ex-contratista di IRS a ser declara culpable na 2023 pa leak declaracionnan di belasting di Trump y otro Mericanonan rico na media y a ricibi un condena di cinco aña di prison.

Desde cu el a bira presidente pa di dos biaha, Trump a tuma varios medida punitivo contra personanan cu e ta considera enemigonan y a emití pordon pa aliadonan politico.

E presidente a pusha pa caso criminal contra oponentenan politico, a purga oficialnan gubernamental cu e ta considera no leal, a enfoca riba bufetenan di abogado involucra den caso anterior contra dje y a kita financiamiento federal for di universidatnan.